


29440



本紀卷第二十四

元史二十四

翰林學士^臣大知制誥^臣蕭^臣修^臣國史^臣宋^臣濂^臣翰林待制^臣承^臣直^臣郎^臣同知制誥^臣蕭^臣國史院編修官^臣王^臣棹^臣等奉

勅修

仁宗一

仁宗聖文欽孝皇帝諱愛育黎拔力八達順宗次子武宗之弟也母曰興聖太后弘吉剌氏至元二十二年三月丙子生大德九年冬十月成宗不豫中宮秉政詔帝與太后出居懷州十年冬十二月至懷州所過郡縣供帳華侈悉令撤去嚴飭扈從毋擾於民且諭僉事王毅察而言之民皆感悅十一年春正月成

宗崩時武宗為懷寧王總兵北邊戊子帝與太后聞
哀奔赴庚寅至衛輝經比干墓顧左右曰紂內荒於
色毒痛四海比干諫紂刳其心遂失天下令祠比干
於墓為後世勸至漳河值大風雪田叟有以孟粥進
者近侍卻不受帝曰昔漢光武嘗為寇兵所迫食豆
粥大丈夫不脩嘗艱阻往往不知稼穡艱難以致驕
惰命取食之賜叟綾一匹慰遣之行次邯鄲諭縣官
曰吾慮衛士不法胥吏科歛重為民困乃命王傳巡
行察之二月辛亥至大都與太后入內哭盡哀復出
居舊邸日朝夕入哭奠左丞相阿忽台等潛謀推皇
后伯要真氏稱制安西王阿難答輔之時左丞相哈
刺哈孫答刺罕稱疾守宿掖門凡三月密持其機陽
許之夜遣人啓帝曰懷寧王遠不能猝至恐變生不
測當先事而發三月丙寅帝率衛士入內召阿忽台
等責以亂祖宗家法命執之鞫問辭服戊辰伏誅諸
王闊闊出牙忽都等曰今罪人斯得太子寔世祖之
孫宜早正天位帝曰王何為出此言也彼惡人潛結
宮壺搆亂我家故誅之豈欲作威覲望神器耶懷寧
王吾兄也正位為宜乃遣使迎武宗於北邊五月乙
丑帝與太后會武宗於上都甲申武宗即位六月癸

元史本紀卷二十四
已詔立帝為皇太子受金寶遣使四方旁求經籍識
以玉刻印章命近侍掌之時有進大學衍義者命詹
事王約等節而譯之帝曰治天下此一書足矣因命
與圖象考經列女傳並刊行賜臣下十一月戊寅受
玉冊領中書省樞密院至大元年七月帝諭詹事曲
出曰汝舊事吾其與同僚協議務遵法度凡世祖所
未嘗行及典故所無者慎勿行二年八月立尚書省
詔太子兼尚書令戒飭百官有司振紀綱重名器夙
夜以赴事功詹事院臣啓金州獻瑟瑟洞請遣使采
之帝曰所寶惟賢瑟瑟何用焉若此者後勿復聞先

是近侍言賈人有售美珠者帝曰吾服御雅不喜飾
以珠璣生民膏血不可輕耗汝等當廣進賢才以恭
儉愛人相規不可以奢靡蠹財相導言者慚而退淮
東宣慰使撒都獻王觀音七寶帽頂寶帶寶鞍卻之
戒諭如初詹事王約啓事二宦者侍側帝問自古宦
官壞人家國有諸約對曰宦官善惡皆有之但恐處
置失宜耳帝然之九月河間等路獻嘉禾有異畝同
穎及一莖數穗者命集賢學士趙孟頫繪圖藏諸祕
書四年春正月庚辰武宗崩壬午罷尚書省以丞相
脫虎脫三寶奴平章樂實右丞保八左丞忙哥帖木

兒參政王巽變亂舊章流毒百姓命中書右丞相塔
思不花知樞密院事鉄木兒不花等參鞫丙戌脫虎
脫三寶奴樂實保八王巽伏誅忙哥怙木兒杖流海
南壬子日赤如赭罷罷城中都召世祖朝諳知政務素
有聲望老臣平章程鵬飛董士選太子少傅李謙少
保張驢右丞陳天祥尚文劉正左丞郝天挺中丞董
土珎太子賓客蕭欒參政劉敏中王思廉韓從益侍
御趙君信廉訪使程鉅夫杭州路達魯花赤阿合馬
給傳詣闕同議庶務甲午宥阿附脫虎脫等左右司
六部官罪乙未禁百官役軍人營造及守護私第丁酉

以雲南行中書省左丞相鐵木迭兒爲中書右丞相太
子詹事完澤集賢大學士李孟並平章政事戊戌以
塔思不花及徽政院使沙沙並爲御史大夫己亥改
行尚書省爲行中書省庚子減價糶京倉米日千石
以賑貧民停各處營造罷廣武康里衛追還印符驛
券璽書及其萬戶等官宣敕辛丑以塔失鉄木兒知
樞密院事壬寅禁鷹坊馳驛擾民敕中書凡傳旨非
親奉者勿行以諸王朝會普賜金三萬九千六百五
十兩銀百八十四萬九千五十兩鈔二十二萬三千
二百七十九錠幣帛四十七萬二千四百八十八匹

二月復玉宸樂院為儀鳳司改延慶司為都功德使
司乙巳命和林江浙行省依前設左丞相餘省唯置
平章二員遙授職事勿與戊申罷運江南所印佛經
辛亥禁諸王駙馬權豪擅據山場聽民樵採罷阿老
瓦丁買賣浙鹽供中政食羊禁宣政院違制度僧甲
寅遣使檢覈小雲石不花所獻河南荒田司徒蕭珙
以城中都徼功毒民命追奪其符印令百司禁錮之
還中都所占民田罷江南行通政院行宣政院甲子
太陰犯填星陞典內司為典內院秩從三品命中書
平章李孟領國子監學諭之曰學校人材所自出卿
等宜數詣國學課試諸生勉其德業敕諸王駙馬戶
在縉山懷來永興縣者與民均服徭役諸司擅奏除
官者毋給宣敕御史臺臣言白雲宗總攝所統江南
為僧之有髮者不養父母避役損民乞追收所受璽
書銀印勒還民籍從之罷福建綉匠河南魚課兩提
舉司省宣徽院參議斷事官丙寅監察御史言比者
尚書省臣蠹國亂政已正典刑其餘黨附之徒布在
百司亦須次第沙汰今中書奏用孛羅鉢木兒為陝
西平章烏馬兒為江浙平章闊里吉思為甘肅平章
塔失帖木兒為河南參政萬僧為江浙參政各人前

任皆受重職或挾勢害民咸乞罷黜制曰可丁卯命西番僧非奉璽書驛券及無西蕃宣慰司文牒者勿輒至京師仍戒黃河津吏驗問禁止罷總統所及各處僧錄僧正都綱司凡僧人訴訟悉歸有司罷仁虞院復置鷹坊總管府庚子命廣西靜江融州軍民官鎮守三載無虞者民官減一資軍官陞一階著爲令思州軍民宣撫司招諭官唐銓以洞蠻楊正思等五人來朝賜金帛有差立淮安忠武王伯顏祠於杭州仍給田以供祀事是月帝謂侍臣曰郡縣官有善有惡其命臺官選正直之人爲廉訪司官而體察之果

有廉能愛民者不次擢用則小人自知激厲矣旌表漳州長泰縣民王初應孝行三月庚辰召前樞密副使吳元珪左丞拜降元伯都刺至京師同諸老臣議事丙戌太陰犯太微上相罷五臺行工部已丑命母赦十惡大逆等罪復典瑞院爲典瑞監庚寅即皇帝位於大明殿受諸王百官朝賀詔曰惟昔先帝事皇太后撫朕眇躬孝友天至由朕得託順考遺體重以母弟之嫡加有削平內難之功於其踐阼曾未踰月授以皇太子寶領中書令樞密使百揆機務聽所總裁于今五年先帝奄棄天下勲戚元老咸謂大寶之承

既有成命非與前聖賓天而始徵集宗親議所宜立者比當稽周漢晉唐故事正位宸極朕以國恤方新誠有未忍是用經時今則上奉皇太后勉進之命下徇諸王勸戴之勤三月十八日於大都大明殿即皇帝位凡尚書省誤國之臣先已伏誅同惡之徒亦已放殛百司庶政悉歸中書命丞相鉄木迭兒平章政事李道復等從新拯治可大赦天下敢以赦前事相告言者罪以其罪諸衙門及近侍人等毋隔越中書奏事諸上書陳言者量加旌擢其僥倖獻地土并山場窰冶及中寶之人並禁止之諸王駙馬經過州郡

不得非理需索應和顧和買隨即給價毋困吾民辛卯禁民間製金箔銷金織金以御史中丞李士英為中書左丞壬辰發京倉米減價以糶賑貧民丁酉命月赤察兒依前太師宣徽使鉄哥為太傅集賢大學士曲出為太保敕百司改陞品級者悉復至元舊制已亥增置左翼右翼指揮各一員寧夏路地震是月帝諭省臣曰卿等哀集中統至元以來條章擇曉法律老臣斟酌重輕折衷歸一頒行天下俾有司遵行則抵罪者庶無冤抑又諭太府監臣曰財用足則可以養萬民給軍旅自今雖一縑之微不言於朕毋輒

元史本紀二十四
七
與人以陝西行尚書省左丞兀伯都刺為中書右丞
昭文館大學士察罕參知政事中書平章政事知樞
密院事床兀兒欽察親軍都指揮使脫火赤拔都兒
中書右丞相知樞密院事鉄木兒不花録軍國重事
知樞密院事也速知樞密院事兼山東河北蒙古軍
都萬戶也先鉄木兒遙授左丞相仁虞院使也兒吉
太子詹事月魯鉄木兒並知樞密院事賜大都路民
年九十者二千三百三十一人人帛二匹八十者八
千三百三十一人人帛一匹夏四月壬寅詔分汰宿
衛士漢人高麗南人冒入者還其元籍癸卯崇星于

回回司天臺以即位恩賜太師太傅太保人金五十
兩銀三百五十兩衣四襲行省臣預朝會者賞銀有
差丁未以太子少保張驢為江浙平章戒之曰以汝
先朝舊人故命汝徃民為邦本無民何以為國汝其
上體朕心下愛斯民戊申以即位告天地于南郊庚
戌拘收下番將校不典兵者虎符銀牌癸丑詔路府
州縣官三年為滿罷典醫監甲寅太陰犯亢熒惑犯
壘壁陣丙辰詔諭宣徽使亦列赤諸蒙古民有貧乏
者發廩濟之丁巳罷中政院戊午以即位告于太廟
辛酉敕國子監師儒之職有才德者不拘品級雖布

衣亦選用癸亥敕諸使臣非軍務急速者毋給金字
圓牌定四宿衛士歲賜鈔二十四萬二百五錠罷中
都留守司復置隆興路總管府九創置司存悉罷之
乙丑封知樞密院事鉄木兒不花為宣寧王賜銀印
丁卯詔曰我世祖皇帝參酌古今立中統至元鈔法
天下流行公私蒙利五十年于茲矣比者尚書省不
究利病輒意變更既創至大銀鈔又鑄大元至大銅
錢鈔以倍數太多輕重失宜錢以鼓鑄弗給新舊恣用
曾未再期其弊滋甚爰咨廷議允協輿言皆願變通
以復舊制其罷資國院及各處泉貨監提舉司買賣

銅器聽民自便應尚書省已發各處至大鈔本及至
大銅錢截日封貯民間行使者赴行用庫倒換仍免
大都上都隆興差稅三年命中書省賑濟甘肅過川
軍罷僧道也里可溫答失蠻頭陀白雲宗諸司改封
親王迭里哥兒不花為湘寧王賜金印食湘鄉州寧
鄉縣六萬五千戶拘還甘肅陝西遼陽省臣所佩虎
符禁鷹坊擾民罷通政院以其事歸兵部增置尚書
員外郎各一員罷回回合的司屬帝御便殿李孟進
曰陛下御極物價頓減方知聖人神化之速敢以為
賀帝感然曰卿等能盡力贊襄使兆民乂安庶幾天

心克享至於秋成尚未敢必今朕踐阼曾未踰月寧有物價頓減之理朕托卿甚重茲言非所賴也孟愧謝帝諭集賢學士忽都魯都兒迷失曰向召老臣十人所言治政汝其詳譯以進仍諭中書悉心舉行南陽等處風雹五月壬申以宦者鉄昔里為利用監卿癸酉八百媳婦蠻與大小徹里蠻寇邊命雲南王及右丞阿忽台以兵討之改封乳毋夫壽國公楊德榮為雲國公丙子命翰林國史院纂脩先帝實錄及累朝皇后功臣列傳俾百司悉上事蹟丁丑禁毋以毒藥釀酒庚辰敕中書省裁省冗司置高昌王傳復度

支院為監罷泉府司長信院司裡監辛巳賜大長公主祥哥刺吉鈔二萬錠壬午制定翰林國史院承旨五員學士侍讀侍講直學士各二員拘諸王駙馬及有司驛券自今遣使悉從中書省給降置祥和署掌伶人金齒諸國獻馴象癸未太陰犯氏賜國師板的吞鈔萬錠以建寺于舊城戊子羅鬼蠻來獻方物甲午復太常禮儀院為太常寺是月禁民捕加鷓鴣六月癸卯敕宣政院凡西番軍務必移文樞密院同議以聞吐蕃犯朮福鎮敕宣政院與樞密院遣兵討之乙巳命侍臣咨訪內外才堪佐國者悉以名聞仍戒敕

諸王恪恭乃職丙午以內侍揚光祖為秘書卿譚振宗為武備卿關居仁為尚乘卿並授弘文館學士置湘寧王迭里哥兒不花王傅丁未太陰犯太微東垣上相已酉詔存恤軍人庚戌太陰犯氏壬子敕甘肅省給過川軍牛種農器令屯田癸丑復太府院為太府監省上都兵馬指揮為五貞甲寅封亦思丹為懷仁郡王賜銀印丁巳敕翰林國史院春秋致祭太祖太宗睿宗御容歲以為常命和林行省右丞孛里馬速忽經理種海屯田大同路宣寧縣民家產擯而死頗類麒麟車載以獻左右曰古所謂瑞物也帝曰五

穀豐熟百姓安業乃為瑞也已未復置長信寺封樞密臣孛羅為澤國公庚申敕自今諸司白事須殿中侍御史侍側癸亥賜晉王也孫鉄木兒鈔五千錠幣帛各二千匹太尉不花金百兩復雲州銀場提舉司置儀鸞局秩皆五品甲子請大行皇帝諡于南郊上尊諡曰仁惠宣孝皇帝廟號武宗丙寅拘収泉府司元給諸商販璽書丁卯罷只合赤八剌合孫所造上供酒戊辰敕諸王朝會後至者如例給賜己巳衛王阿木哥入見帝諭省臣曰朕與阿木哥同父而異母朕不撫育彼將誰賴其賜鈔二萬錠他勿援例帝覽

貞觀政要諭翰林侍講阿林鉄木兒曰此書有益於
國家其譯以國語刊行俾蒙古色目人誦習之濟寧
東平歸德高唐徐邳諸州水給鈔賑之河間陝西諸
縣水旱傷稼命有司賑之仍免其今年租諸王塔刺
馬的遣使進馴象秋七月辛未朔拘還遼陽省官提
調諸事圓符璽書驛券裁減虎賁司職負賜上都宿
衛士貧乏者鈔十三萬九千錠丁丑鞏昌寧遠縣暴
雨山土流涌救內外軍官並軍官一等癸未甘州地
震大風有聲如雷以朝會恩賜諸王秃滿金百五十
兩銀五千二百五十兩幣帛三千匹乙酉賜相寧王
迭里哥兒不花所部鈔三萬二千錠癸巳太陰掩畢
甲午置經正監掌蒙古軍牧地秩正三品官五員丁
酉太陰犯鬼距星巳亥詔諭省臣曰朕前戒近侍毋
輒以文記傳旨中書自今敢有犯者不須奏聞直捕
其人付刑部究治敕御史臺臣選更事老成者為監
察御史超授中散大夫典內院使孛朮榮祿大夫是
月江陵屬縣水民死者衆太原河間真定順德彰德
大名廣平等路德濮恩通等州霖雨傷稼大寧等路
隕霜敕有司賑恤閏七月辛丑命國子祭酒劉賡詣
曲阜以太牢祠孔子甲辰車駕將還大都太后以秋

稼方盛勿令鷹坊馳人衛士先往庶免害稼擾民敕
禁止之樞密院奏居庸關古道四十有三軍吏防守
之處僅十有三舊置千戶位輕責重請置隆鎮萬戶
府俾嚴守備制曰可崇五星於司天臺以故魯王刁
幹八刺適子阿禮嘉世禮襲其封爵分地乙巳以朝
會恩賜月赤察兒床兀兒金二百兩銀二千八百兩
幣帛有差丙午奉武宗神主祔于太廟戊申封李孟
秦國公命亦憐真乞刺思為司徒己酉吐蕃寇禮店
文州命摠帥亦憐真等討之辛亥以西僧藏不班八
為國師賜玉印戊午復置司禪監己未詔諭省臣曰

國子學世祖皇帝深所注意如平章不忽木等皆蒙
古人而教以成材朕今親定國子生額為三百人仍
增陪堂生二十人通一經者以次補伴讀著為定式
敕軍官七十致仕始聽子弟承襲其有未老即託疾
引年令幼弱子弟襲職者除名不叙其巧計求遷者
以違制論壬戌命賑卹嶺北流民上都立通政院領
蒙古諸驛秩正二品甲子寧夏地震乙丑魯國大長
公主祥哥剌吉進號皇姊大長公主遣使招諭黑水
白水等蠻十二萬餘戶來降丙寅太陰犯軒轅賜諸
王阿不花等金二百兩銀七百五十兩鈔一萬三千

六百三十錠幣帛各有差丁卯完澤李孟等言方今
進用儒者而老成日以凋謝四方儒士成才者請擢
任國學翰林秘書太常或儒學提舉等職俾學者有
所激勸帝曰卿言是也自今勿限資級果才而賢雖
白身亦用之敕直省舍人以其半給事殿庭半聽中
書差遣禁醫人非選試及著籍者毋行醫藥大同宣
寧縣雨雹積五寸苗稼盡殞八月己巳朔裁定京朝
諸司負數並依至元三十年舊額楚王牙忽都所部
乏食給鈔萬錠出粟五千石賑之賜環衛圍人鈔三
萬錠以近侍曲列失為戶部尚書甲戌賜皇姊大長

公主鈔萬錠丙戌安南世子陳日養奉表以方物來
貢敕西番軍務隸宣政院九月己亥朔遥授左丞相
不花進太尉丙午遥授湖廣平章安南國王陳益稷
入見言臣自世祖朝來歸妻子皆為國人所害朝廷
授以王爵又賜漢陽田五百頃俾自贍以終餘年今
臣年幾七十而有司拘臣所受田就食無所帝謂省
臣曰安南國王慕義來歸宜厚其賜以懷遠人其進
勲爵受田如故戊申禁民彈射飛鳥殺馬牛羊當乳
者禁衛士不得私衣侍宴服及以質於人庚戌命樞
密院閱各省軍馬壬子改元皇慶詔曰朕賴天地祖

宗之靈慕承聖緒永惟治古之隆羣生咸遂國以乂
寧朕夙興夜寐不敢怠遑任賢使能興滯補闕庶其
臻茲欽時五福用敷錫厥庶民朕之志也踰年改元
厥有彛典其以至大五年為皇慶元年都水監卿木
八刺沙傳旨給驛往取杭州所造龍舟省臣諫曰陛
下踐祚誕告天下凡非宣索毋得擅進誠取此舟有
乖前詔詔止之復置中宮位下怯憐口諸色民匠打
捕鷹坊都總管府秩正三品乙卯太陰犯畢丁巳奉
太后旨以求平路歲入除經費外悉賜魯國大長公
主給雲南王老的部屬馬價一萬二千錠丙寅敕省
部官勿托以宿衛廢職罷西番茶提舉司是月江陵
路水漂民居溺死十有八人冬十月戊辰朔有事于
太廟己巳敕繪武宗御容奉安大崇恩福元寺月四
上祭辛未賜大普慶寺金千兩銀五千兩鈔萬錠西
錦綵改紗羅布帛萬端田八萬畝邸舍四百間丁丑
禁諸僧寺毋得冒侵民田辛巳罷宣政院理問僧人
詞訟以蘄縣萬戶府鎮慶元紹興沿海萬戶府鎮處
州宿州萬戶府兼鎮台州戊子省海道運糧萬戶為
六員千戶為七所特授故太師月兒魯子木剌忽祭
祿大夫知樞密院事辛卯罷諸王斷事官其蒙古人

犯盜詐者命所隸千戶鞠問壬辰詔收至大銀鈔敕
諸衛漢軍練習武事置群牧監秩正三品掌興聖宮
位下畜牧癸巳詔置汴梁平江等處田賦提舉司掌
大承華普慶寺貲產給雲南增戍軍鈔二萬五千錠
丙申太白犯壘壁陣十一月戊戌封司徒買僧為趙
國公辛丑命延安鳳翔安西軍屯田紅城者還陝西
屯田敕商稅官盜稅課者同職官贓罪立乖西府以
土官阿馬知府事佩金符李孟奏錢糧為國之本世
祖朝量入為出恒務撙節故倉庫充牣今每歲支鈔
六百餘萬錠又土木營繕百餘處計用數百萬錠內

降旨賞賜復用三百餘萬定北邊軍需又六七百萬
錠今帑藏見貯止十一萬餘錠若此安能周給自今
不急浮費宜悉停罷帝納其言凡營繕悉罷之辛亥
諸王不里牙屯等誣八不沙以不法詔竄不里牙屯
秃干于河南因忽乃于揚州納里于湖廣太那于江
西班牙出兀那于雲南壬子賑欽察衛糧五千七百五
十三石甲寅太陰犯輿鬼戊午禁漢人回回術者出
八諸王駙馬及大臣家己未以遼陽省平章政事合
散為中書平章政事甲子敕增置京城米肆十所日
平糶八百石以賑貧民丙寅加徽政使羅源為大司

徒賑諸軍糧七千六十石十二月辛未增置經正監
官為八員置尚牧所秩五品掌太官羊癸酉封宣政
會福院使暗普為秦國公增置兵部侍郎郎中各一
員庚辰太白經天復以陝西屯田軍三千隸紅城萬
戶府壬午詔曰今歲不登民何以堪春蒐其勿令供
億癸未太白經天甲申太陰犯太微西垣上將浙西
水災免漕江浙糧四分之一存留賑濟命江西湖廣
補運輸京師占城遣使奉表貢方物庚寅申禁漢人
持弓矢兵器田獵曲赦大都大辟囚一人并流以下
罪辛卯裁宗正府官為二十八員遣官監視焚至大

鈔壬辰太白經天敕初設邊遠官員俟到任方降敕
牒乙未命李孟整飭國子監學中書省臣言世祖定
立選法陞降以示激勸今官未及考或無故更代或
躡等進階僭受國公丞相等職諸司已裁而復置者
有之今春以內降旨除官千餘人其中欺偽豈能悉
知壞亂選法莫此為甚帝曰凡內降旨一切勿行賜
濟王朶列納印以和林稅課建延慶寺詔諭安南國
世子陳曰褒曰惟我祖宗受天明命撫有萬方威德
所加柔遠能邇乃者先皇帝龍馭上賓朕以王侯臣
民不釋之故於至大四年三月十八日即皇帝位遵

踰年改元之制以至大五年爲皇慶元年今遣禮部尚書乃馬台等賚詔往諭仍頒皇慶元年曆日一本卿其敬授人時益脩臣職毋替爾祖事大之誠以副朕不忘柔遠之意

皇慶元年春正月庚子帝諭御史大夫塔思不花曰凡大臣不法卿等劾奏毋避朕自裁之癸卯敕諸儔犯奸盜詐僞鬪訟仍令有司專治之甲辰授大師錄軍國重事知樞密院事脫兒赤顏開府儀同三司嗣洪陽王戊申改隆鎮萬戶府爲隆鎮衛庚戌封知樞密院事醜漢爲安遠王出總北軍壬子敕軍不滿五

千者勿置萬戶癸丑太陰犯太微東垣上將旌表廣州路番禺縣孝子陳韶孫戊午制諸王設王傳六員銀印其次設官四員改封濟王朶列納爲吳王賜衛王阿木哥慶元路定海縣六萬五千戶加崇福使也里牙秦國公己未陞崇祥監爲崇祥院秩正二品壬戌陞翰林國史院秩從一品帝諭省臣曰翰林集賢儒臣朕自選用汝等毋輒擬進人言御史臺任重朕謂國史院尤重御史臺是一時公論國史院實萬世公論二月丁卯朔徙大都路學所置周宣王石鼓于國子監敕稱海屯內漢軍存恤二年庚午西北諸王

也先不花遣使貢珠寶皮幣馬駝賜鈔一萬三千六百錠辛未改安西路爲奉元路吉州路爲吉安路壬申以霸州文安縣屯田水患遣官䟽決之遣使賜西僧金五千兩銀二萬五千兩幣帛三萬九千九百匹甲戌制定封贈名爵等級著爲令改和林省爲嶺北省丙子給稱海屯田牛二千賜晉王也孫鉄木兒南康路戶六萬五千世祖諸皇子也先鉄木兒福州路福安縣脫歡之子不答失里福州路寧德縣忽都魯鉄木兒之子泉州路南安縣愛牙赤之子邵武路光澤縣戶並一萬三千六百有四食其歲賦已卯置衛

龍都元帥府秩正二品以古阿速衛隸之八百媳婦來獻馴象二壬午太陰犯亢封孛羅爲永豐郡王置德安府行用鈔庫罷莊浪州唐兀千戶所丙戌省樞密斷事官爲八貞庚寅敕嶺北省賑給闕食流民敕兩淮民種荒田者如例輸稅遣官同江西江浙省整治茶鹽法賜韓國公主普達實憐鈔萬錠詔勉勵學校賑山東流民至河南境者通澠州饑賑糧兩月三月丁酉朔熒惑犯東井陞給事中秩正三品罷諸王大臣私第營繕戊戌右丞相鉄木迭兒言自今左右司六部官有不盡心初則論決不悛則黜而不叙制曰

元史本紀卷之二十四 十九
可省女直水達達萬戶府冗員敕諸王脫脫所招戶
其未藉者俾隸有司己亥以生日爲天壽節庚子加
御史大夫火尼赤開府儀同三司罷衛龍都元帥府
壬寅太陰犯東井敕歸德亳州以憲宗所賜不憐吉
帶地一千七十三頃還其子孫丙子敕北邊使者非
軍機毋給驛丁未置內正司秩正三品卿少卿丞各
一員戊申陞典內院秩正二品以前河南行省平章
政事塔失海牙爲御史大夫改翰林國史院司直司
爲經歷司置經歷都事各一員置五臺寺濟民局秩
從五品賜安王完澤及其子金三百兩銀一千二百

五十兩鈔三千五百錠賜汴梁路上方寺地百頃遼
陽省增置灤陽寬河驛甲寅西北諸王也先不花等
遣使以橐駝方物八貢丙辰封同知徽政院事常不
闌奚爲趙國公庚申敕簡汰大明宮興聖宮宿衛甲
子給北軍幣帛二十萬匹遣戶部尚書馬兒經理河
南屯田乙丑命河南省建故丞相阿朮祠堂封諸王
塔思不花爲恩平王夏四月丁卯簡汰控鶴還本籍
以都水監隸大司農寺置察罕腦兒捕盜司秩從七
品庚午命浙東都元帥鄭祐同江浙軍官教練水軍
辛未給鈔萬錠修香山永安寺趙王汝安郡告饑賑

糧八百石陞保定路萬戶府為上萬戶癸酉車駕幸上都丙子太白晝見封郵國大長公主忙哥台為大長公主賜金印增也可扎魯忽赤為四十二員壬午熒惑犯輿鬼敕皇子碩德八剌置四宿衛敕僧人田除宋之舊有并世祖所賜外餘悉輸租如制阿速衛指揮那懷等冒增衛軍六百名盜支糧七千二百石幣帛一千二百匹鈔二百八錠敕中書樞密按治封知樞密院事木剌忽為廣平王癸未熒惑犯積屍氣庚寅太白經天大崇恩福元寺成置隆禧院龍興新建縣霖雨傷禾彰德安陽縣蝗五月丙申朔以中書

平章政事合散為中書左丞相江浙行省平章張驢為中書平章政事知樞密院事也先鐵木兒授開府儀同三司壬寅諸王脫忽思海迷失以農時出獵擾民敕禁止之自今十月方許出獵改和林路為和寧路賜諸王阿木哥鈔萬錠速速迭兒按麻思等各千錠以蒙古驛隸通政院置濮陽王脫脫木兒王傳官四員給上都灤陽驛馬三百疋己未縉山縣行宮建涼殿己未以西寧州田租稅課賜太長公主忙古台賑宿衛士糧二萬石陞回回司天臺秩正四品彰德河南隴西電六月乙丑朔日有食之丁卯天雨毛已

已太陰犯天閔敕李孟博選中外才學之士任職翰
林給羊馬鈔價濟嶺北甘肅戍軍之貧者壬申減四
川監額五千引賜崇福寺河南官地百頃丁亥敕罷
封贈誠左右守法度勤職業勿妄僥倖加官賜安遠
王醜漢金百兩銀五百兩鈔千錠鞏昌河州等路饑
免常賦二分秋七月辛丑定內正司官為六員禁諸
王徑宣旨於各路徒中都內帑金銀器歸太府監賜
新店諸驛鈔三千八百錠充使者餽廩癸卯詔獎勵
御史臺丙午陸大司農司秩從一品帝諭司農曰農
乘衣食之本汝等舉諳知農事者用之敕諸王小薛
部歸晉寧路襄垣縣民田中書參政賈鈞以病請告
賜鈔三百錠給安車還鄉戊午太陰犯東井八月丁
卯敕探馬赤軍羊馬牛依舊制百稅其一戊辰太白
犯軒轅辛未太陰犯填星丁丑罷司裡監己卯以吏
部尚書許師敬為中書參知政事庚辰車駕至自上
都壬午辰星犯右執法置少府監隸大都留守司甲
申賜諸王闊闊出金束帶一銀百五十兩鈔二百錠
乙酉太白犯右執法辛卯敕雲南省右丞阿忽台等
領蒙古軍從雲南王討八百媳婦蠻濱州旱民飢出
利津倉米二萬石減價賑糶寧國路涇縣水賑糧二

月安南國王陳益稷來朝九月丁酉增江浙海漕糧
二十萬石戊戌罷征八百媳婦蠻大小徹里蠻以重
書招諭之辛丑命司徒田忠良等詣真定玉華宮祀
睿宗御容八百媳婦大小徹里蠻獻馴象及方物甲
辰陞參議中書省事阿卜海牙爲參知政事拘火者
等所佩國公司徒印丁巳太陰犯亢壬戌瓊州黎賊
嘯聚遣官招諭冬十月甲子有事于太廟改隆興路
爲興和路賜銀印雲南行省右丞筭只兒威有罪國
師搠思吉幹節兒奏請釋之帝斥之曰僧人宜誦佛
書官事豈當與耶癸未以中書參知政事察罕爲中

書平章政事商議中書省事丁亥太陰犯平道戊子
太陰犯亢翰林學士承旨王連赤不花等進順宗成
宗武宗實錄罷造船提舉司辛卯赦天下賜李孟潞
州田二十頃十一月戊戌調汀漳畬軍代亳州等翼
漢軍於本處屯田己亥太陰犯壘壁陣甲辰捕滄洲
羣盜阿失荅兒等擒之支解以徇丙午諭六部官毋
踰越中書奏事丙辰封駙馬脫脫木兒爲岐王庚申
賜諸王寬徹忽荅迷失金百五十兩銀一千五百兩
鈔三千錠弊帛有差占城國進犀象緬國主遣其婿
及雲南不農蠻酋長岑福來朝十二月癸亥中書平

元史卷一百一十五
三
章政事李孟致仕以樞密副使張珪為中書平章政
事癸酉遣使分道決囚壬申晉王也孫鉄木兒所部
告飢賑鈔一萬五千錠庚辰知樞密院事答失蠻罷
省海道運糧萬戶一員增副萬戶為四員甲申熒惑
填星辰星聚斗鷹坊不花即列請往河南湖廣括取孔
雀环禽敕以擾民不允丁亥遣官祈雪于社稷嶽鎮
海瀆省臣言中書職在摠挈綱維比者行省六部諸
司應決不決者徃徃作疑咨呈以致文繁事弊詔體世
祖立中書初意定擬程式以聞俾遵行之敕回回合
的如舊祈福凡詞訟悉歸有司仍拘還先降璽書戊

子太陰犯熒惑己丑宗王女班丹給驛取江南田租
命拘還驛券是月諸王春丹叛

二年春正月甲午以察罕腦兒等處宣慰使伯忽為

御史大夫辛丑封前尚書右丞相乞台普濟為安吉

王丙午寧王闊闊出薨丁未以太府卿禿忽魯為中

書右丞相戊申太陰犯三公己未置遼陽行省儒學

提舉司二月壬戌改典內院為中政院秩正一品甲

子以皇后受冊寶遣官祭告天地於南郊及太廟丁

丑日赤如赭己卯免徵益都飢民所貸官糧二十萬

石各寺修佛事日用羊九千四百四十敕遵舊制易

以蔬食命張珪綱領國子學庚辰冀寧路饑禁釀酒
辛巳詔以錢糧造作訴訟等事悉歸有司以清中書
之務壬午西北諸王也先不花進馬駝璞玉丁亥敕
外任官應有公田而無者皆以至元鈔給之以乖西
府隸播州宣撫司功德使亦憐真等以佛事奏釋重
囚不允帝諭左右曰回回以寶玉鬻於官朕思此物
何足為寶唯善人乃可為寶善人用則百姓安茲國
家所宜寶也丙申以御史中丞脫歡答刺罕為御史
大夫庚子熒惑犯壘壁陣以晉寧大同大寧四川鞏
昌甘肅饑禁酒丙午冊立皇后弘吉刺氏詔天下丁

未彗出東井壬子禿忽魯言臣等職專燮理去秋至
春亢旱民間乏食而又隕霜雨沙天文示變皆由不
能宣上恩澤致茲災異乞黜臣等以當天心帝曰事
豈關汝輩耶其勿復言御史中丞郝天挺上疏論時
政帝嘉納之賜西僧拂思吉斡節兒鈔萬錠丙辰以
皇后受冊寶遣官恭謝太廟以亢旱既久帝於宮中
焚香默禱遣官分禱諸祠甘雨大注詔敦諭勸課農
桑夏四月甲子崇星于司天臺癸酉賜壽寧公主橐
駝三十六乙亥車駕幸上都丙子高麗王辭位以其
世子王燾為征東行中書省左丞相上柱國封高麗

國王辛巳加御史大夫伯忽開府儀同三司太傅壬午置中瑞司秩正四品甲申詔遴選賢士纂修國史乙酉御史臺臣言富人寅緣特旨濫受官爵徵政宣徽用人率多罪廢之流近侍託為貧乏互奏恩賞西僧以作佛事之故累釋重囚外任之官身犯刑憲輒營求內旨以免罪諸王駙馬寺觀臣僚土田每歲徵租亦極為擾民請悉革其弊制曰可詔罷不急之役真定保定河間大寧路饑並免今年田租十之三仍禁釀酒安南國遣使來貢方物五月辛丑陞中書右丞兀伯都刺為平章政事左丞八剌脫因為右丞參知政事阿卜海牙為左丞參議中書省事禿魯花鉄木兒為參知政事順德異寧路饑辰州水賑以米鈔仍禁釀酒檀州及獲鹿縣蝻六月己未朔京師地震癸亥禿忽魯等以災異乞賜放黜不允丙寅京師地震辛未以參知政事許思敬綱領國子學乙亥詔諭僧俗辨訟有司及主僧同問續置土田如例輸稅丙子賜諸王按灰金五十兩銀七百五十兩金束帶一幣帛各四十匹己卯河東廉訪使趙簡言請選方正博洽之士任翰林侍讀侍講學士講明治道以廣聖聽從之御史臺臣言比年廉訪司多不悉心奉職宜令

監察御史檢覈名實而黜陟之廣海及雲南甘肅地
遠遷調者憚弗肯往乞令後加一等官之制曰可壬
午命監察御史檢察監學官考其殿最癸未命委官
簡汰衛士甲申建崇文閣於國子監給馬萬疋與函
王南忽里等軍士之貧乏者以宋儒周敦頤程顥
弟頤張載邵雍司馬光朱熹張栻呂祖謙及故中書
左丞許衡從祀孔子廟廷上都民飢出米五千石減
價賑糶河決陳亳睢州開封陳留縣沒民田廬秋七
月己丑朔歲星犯東井辛卯太白晝見癸巳以作佛
事釋囚徒二十九人賜宣寧王鉄木兒不花幣帛百

二十四安遠王亦思丹等各百匹保定真定河間民
流不止命所在有司給糧兩月仍悉免今年差稅諸
被災地並弛山澤之禁獵者毋入其境甲午置榷茶
批驗所并茶由局官乙未太白晝見庚子立長秋寺
掌武宗皇后宮政秩三品敕衛王阿木哥歲賜外給
鈔萬錠賜駙馬脫鉄木兒金百五十兩銀七百五十
兩鈔二千錠幣帛五十匹辛丑復立四川等處儒學
提舉司壬寅京師地震免大寧路今歲鹽課丁未賜
諸王火羅思迷脫歡南忽里駙馬忙兀帶金二百兩
銀一千二百兩鈔一千六百錠幣帛各有差己酉改

淮東淮西道宣慰司爲淮東宣慰司以淮西三路隸
河南省敕守令勸課農桑勤者陞怠者黜降著爲
令丙辰太白晝見丁巳太白經天雲州蒙古軍乏食
戶給米一石興國屬縣蝻發米賑之八月戊午朔太
白晝見揚州路崇明州大風海潮泛溢漂沒民居壬
戌歲星犯東井丁卯車駕至自上都庚午以侍御史
薛居敬爲中書參知政事壬午太陰犯輿鬼九月以
相兒加思巴爲帝師癸巳以宣徽院使完澤知樞密
院事戊申封脫歡爲安定王賜金印敕鎮江路建銀
山寺勿徙寺傍塋冢京師大旱帝問咥災之道翰林
學士程鉅夫舉湯禱桑林事帝獎諭之冬十月己卯
敕中書省議行科舉封不谷滅里爲安德王辛未徙
崑山州治于太倉昌平縣治於新店癸未以遼陽路
之懿州隸遼陽行省復置蒙陰縣隸莒州乙酉旌表
高州民蕭父妻趙氏貞節免其家科差壬寅敕漢人
南人高麗人宿衛分司上都勿給弓矢甲辰行科舉
詔天下以皇慶三年八月天下郡縣與其賢者能者
充貢有司次年二月會試京師中選者親試于廷賜
及第出身有差帝謂侍臣曰朕所願者安百姓以圖
至治然匪用儒士何以致此設科取士庶幾得真儒

之用而治道可興也十二月辛酉可里馬丁上所編
萬年曆發米五千石賑阿只吉部之貧乏者海都都
哇屬戶內附敕所在給衣糧丙子定百官致仕資格
甲申詔飭海道漕運萬戶府京師以久旱民多疾疫
帝曰此皆朕之責也赤子何罪明日大雪以嘉定州
德化縣民災發粟賑之

本紀卷第二十四

本紀卷第二十五

元史二十五

翰林學士^孟憲^知制誥修^夏吳^榮濂^翰待制承直郎同知制誥兼國史院編修官臣王構等奉
勅修

仁宗二

延祐元年春正月丁亥授中書右丞劉正平章政事
商議中書省事丙申除四川酒禁興元鳳翔涇州邠
州嵐荒禁酒庚子敕各省平章爲首者及漢人省臣
一負專意訪求遺逸苟得其人先以名聞而後致之
以江淞行中書省左丞高昉爲中書參知政事丁未
詔改元延祐釋天下流以下罪囚免上都大都差稅

二年其餘被災曾經賑濟人戶免差稅一年庚戌中書省臣禿魯忽等以災變乞罷免不允二月庚申立印經提舉司戊辰太寧路地震癸酉熒惑犯東井甲戌以侍御史趙世延為中書叅知政事詔免蒙古地差稅二年商賈勿免己卯給鈔六千三百錠賑濟良鄉諸驛壬午以合散為中書右丞相監脩國史癸未以中書叅政高昉為集賢學士三月壬辰太陰掩熒惑賜諸王塔失蒙古鈔千錠衣二襲戊戌真定保定河間民饑給糧兩月己亥白暈亘天連環貫日癸卯暹國王遣其臣愛耽入貢改南劍路曰延平劍浦縣曰南平乙巳以僧人作佛事擇釋獄囚命中書審察丙午封阿魯禿為趙王戊申車駕幸上都己酉敕奸民宮其子為闖宦謀避徭役者罪之辛亥命叅知政事趙世延綱領國子學癸丑中書平章政事察罕致仕晉寧民侯喜兒昆弟五人並坐法當死帝嘆曰彼一家不幸而有是事其擇情輕者一人杖之俾養父母毋絕其祀閏三月甲寅朔敕減樞密知院冗員辛酉太陰犯輿鬼罷呪僧月給俸遣人視大都至上都駐蹕之地有侵民田者計畝給直丙寅太陰犯太微東垣丁丑畿內及諸衛屯軍饑賑鈔七千五百錠汴

梁濟寧東昌等路隴州開州青城齊東渭源東明長垣等縣隕霜殺桑果禾苗歸州告饑出糧減價賑糶馬八兒國主昔刺木丁遣其臣愛思丁貢方物夏四月甲甲朔大寧路地震有聲如雷丁亥敕儲稱海五河屯田粟以脩賑濟太常寺臣請立北郊不允陞延慶寺秩正二品西番諸驛貧乏給鈔萬錠曲魯部畜牧斃耗賑鈔八百七十三錠己酉廢真陽含光二縣入英德州壬辰諸王脫脫斃以月思別襲位己酉敕郡縣官勤職者加賜幣帛以鐵木迭兒錄軍國重事監修國史立回回國子監帝以資治通鑑載前代興

亡治亂命集賢學士忽都魯都兒迷失及李孟擇其切要者譯寫以進武昌路饑命發米減價賑糶五月甲寅朔賜營王也先鐵木兒鈔萬錠戊午辰星犯輿鬼丁卯賜李孟孝感縣地二十八頃禁諸王支屬徑取分地租賦擾民敕嶺北行省瘞陣沒遺骸乙亥賑怯魯連地貧乏者米三千石丁丑徙滄州治於長蘆鎮戊寅京兆為故儒臣許衡立魯齋書院降璽書旌之庚辰廬陽麻陽二縣以土賊作耗蠲其地稅賦營王也先鐵木兒支屬貧乏賑糧兩月武陵縣霖雨水溢溺死居民漂沒廬舍禾稼潭州漢陽思州民饑並

發廩減價糶賑之膚施縣大風雹損禾并傷人畜六月戊子敕內侍今後止授中官勿畀文階置雲南行省儒學提舉司封河南省丞相卜憐吉帶為河南王壬辰增置畿內州縣同知主簿各一員諸王察八兒屬戶匱乏給糧一歲仍俾屯田以自贍發軍增墾河南芍陂等處屯田乙未熒惑犯右執法戊申增置兩浙鹽運司判官一員甲辰拘河西僧免輸租賦璽書敕諸王戚里入覲者宜趁夏時芻牧至上都毋輒入京師有事則遣使奏稟衡州郴州興國永州路耒陽州饑發廩減價賑糶宣平仁壽白登縣雹損稼傷人

畜秋七月乙卯谷即乃所部匱乏戶給糧二石庚午命中書省臣議復封贈賜晉王也孫鐵木兒部鈔十萬錠詔開下番市舶之禁賜衛王阿木哥等鈔七千錠乙亥會福院越制奏旨除官教自今舉人聽中書可否以聞申飭私鹽之禁沅陵盧溪二縣水武清縣渾河隄決淹沒民田發廩賑之八月戊子車駕至大都癸卯陞太常寺為太常禮儀院秩正二品丁未冀寧汴梁及武安涉縣地震壞官民廬舍武安死者十四人涉縣三百二十六人台州岳州武岡常德道州等路水發廩減價賑糶九月壬戌改提點教坊司事

爲大倭己巳復以鐵木迭兒爲右丞相合散爲左丞相罷陝西諸道行御史臺降儀鳳卿爲儀鳳大使肇慶武昌建德建康南康江州袁州建昌贛州杭州撫州安豐等路水發廩減價賑糶冬十月癸巳陞潁州萬戶府爲中萬戶府乙未敕吏人轉官止從七品在選者降等注授申飭內侍及諸司隔越中書奏請之禁敕下番商販湏江淞省給牒以往歸則征稅如制私往者沒其物遣官括淮民所佃閑田不輸稅者丙申復甘肅屯田置沙瓜等處屯儲總管萬戶府秩正三品乙巳置恩平王塔思不花傳二人庚戌辰星犯

東咸監察御史言乞命樞密院設法教練士卒應軍官襲職者試以武事而後任之制曰可遣張馭經理江南田糧十一月壬子陞司天臺爲司天監秩正三品賜銀印乙卯改大同侍衛親軍都指揮使司爲中都威衛使司置保安軍于麻陽縣以禦徭蠻戊辰以通政院使蕭拜住爲中書右丞辛未以翰林學士承旨荅失蠻知樞密院事癸酉敕吏人賊行者黥其面大寧路地震有聲如雷戊寅鐵木迭兒言比者僚屬及六部諸臣皆晚至早退政務廢弛今後有如此者視其輕重杖責之臣或自惰亦令諸人陳奏帝曰如

更不悛則罷不叙以前中書右丞相禿忽魯知樞密院事靜安路饑發糧賑之詔檢覈浙西江東江西田稅十二月壬午汴梁南陽歸德汝寧淮安水救禁釀酒量加賑恤癸未賑諸王鐵木兒不花部米五千碩禿滿部二千石辛卯禁諸王駙馬權勢之人增價鬻鹽壬辰詔定官負士庶衣服車輿制度甲午太陰犯輿鬼己亥敕中書省定議孔子五十三代孫當襲封衍聖公者以名聞庚子遣官浚揚州淮安等處運河以翰林學士承旨李孟復爲中書平章政事癸卯太陰犯房甲辰太陰犯天江乙巳勅經界諸衛屯田沔陽歸德汝寧安豐等處饑發米賑之

二年春正月乙卯歲星犯輿鬼戊午懷孟衛輝等處饑發米賑之己未太白晝見癸亥太陰犯軒轅丙寅霖雨壞渾河隄堰沒民田發卒補之禁民煉鐵發卒浚澠州漕河丁卯太陰犯進賢戊辰晉寧等處民饑給鈔賑之己巳置大聖壽萬安寺都總管府秩正三品庚午立行用庫於江陰州敕以江南行臺贓罰鈔賑恤饑民乙亥詔遣宣撫使分十二道問民疾苦黜陟官吏並給銀印命中書省臣分領庶務禁南人典質妻子販買爲驅御史臺臣言比年地震水旱民流

盜起皆風憲顧忌失於糾察宰臣燮理有所未至或
近侍蒙蔽賞罰失當或獄有寬濫賦役繁重以致乖
和宜與老成共議所由詔明言其事當行者以聞諸
王脫列鐵木兒部闕食以鈔七千五百錠給之益都
般陽晉寧民饑給鈔米賑之二月己卯朔會試進士
戊子太白晝見癸巳太白經天甲午詔禁民轉鬻養
子丙申賜諸王納忽荅兒金五十兩銀二百五十兩
鈔五百錠庚子詔以公哥羅古羅思監歲班歲卜為
帝師賜玉印仍詔天下壬寅雲南王老的來朝辰沅
洞蠻吳干道為寇敕調兵捕之乙巳賜諸王月魯鐵

木兒鈔萬錠丙午太白經天是月晉寧宣德等處饑
給米鈔賑之真州揚子縣火發米減價賑糶三月乙
卯廷試進士賜護都魯兒張起巖等五十六人及第
出身有差丙辰太陰色赤如赭庚午帝率諸王百官
奉玉冊玉寶加上皇太后尊號詔天下蠲逋欠稅課
丁丑以中書平章張驢為江淞行省平章政事夏四
月戊寅朔日有食之辛巳賜進士恩榮宴於翰林院
癸巳敕亦思丹等部出征軍有後期及逃還者並斬
以徇甲午諭晉王也孫鐵木兒以先朝所賜惠州銀
礦洞歸還有司庚子太陰犯壘壁陣辛丑賜會試下

第舉人七十以上從七流官致仕六十以上府州教授餘並授山長學正後勿授例敕諸王分地仍以流官爲達魯花赤各位所辟爲副達魯花赤命李孟等類集累朝條格俟成書聞奏頒行立規運提點所秩五品置官四員廣貯庫秩七品置官三員並隸壽福院乙巳車駕幸上都宣徽院以供尚膳遣人獵於歸德敕以其擾民特罷之加授特進上卿玄教大宗師張留孫開府儀同三司丙午封諸王察八兒爲汝寧王潭州江州建昌沅州饑發廩賑糶五月戊申朔改給各道廉訪司銀印復立陝西諸道行御史臺貴赤張小厮等招戶六千勒還民籍御史中丞王毅乞歸養親不許庚申賜公主燕海牙鈔千錠辛酉太陰犯天江乙丑秦州成紀縣山移是夜疾風電雹北山南移至夕河川次日再移平地突出土阜高者二三丈陷沒民居敕遣官覈驗賑恤庚午太白晝見立海西遼東鷹坊萬戶府隸中政院壬申諸王撒都失里薨甲戌日赤如赭加授宦者中尚卿續元暉昭文館大學士乙亥日赤如赭是月發粟三百石賑諸王按鐵木兒等部貧民奉元龍興吉安南康臨江袁州撫州江州建昌贛州南安梅州辰州興國潭州岳州常德

武昌等路南豐州澧州等處饑並發廩賑糶六月辛巳察罕腦兒諸驛乏食給糧賑之甲申太白晝見是夜太陰犯平道乙未徙陝西肅政廉訪司于鳳翔戊戌幽王南忽里等部困乏給鈔俾買馬羊以濟之河決鄭州己亥置汝寧王察八兒王傅官辛丑以濟寧益都亢旱汰省宿衛士芻粟癸卯太白犯東井丙午辰星犯輿鬼緬國主遣其子脫刺合等來貢方物秋七月庚戌增興和路治中一員戊申賜宣寧王鐵木兒不花及其二弟鈔萬錠并玉具鞍勒幣帛壬子增尚舍寺官六員爲八員雲需總管府增同知二員癸

丑復賜晉王也孫鐵木兒惠州銀鐵洞甲寅置諸王幹羅溫孫王傅官四員復陳州商水鎮爲南屯縣省兩淮屯田總管府官四員併提領所入提舉司改只合赤八刺合孫總管府爲尚供府乙卯贛州土賊蔡五九聚衆作亂敕遣兵捕之敕阿宿衛戶貧乏者結牛種耕具於連怯烈地屯田甲子江南湖廣道奉使溫迪罕言廩訪司公田多取民租宜復舊制從之乙丑陞崇福院秩正二品癸酉賜衛王阿木哥鈔萬錠命鐵木迭兒總宣政院事詔諭中外是月畿內大雨灤州昌平香河寶坻等縣水沒民田廬潭州金州永

州路茶陵州霖雨江漲沒田稼出米減價賑糶八月
丙戌贛州賊蔡五九陷汀州寧化縣僭稱王號詔遣
江洲行省平章張驢等率兵討之己丑車駕至自上
都乙未臺臣言蔡五九之變皆由昵匪馬丁經理田
糧與郡縣橫加酷暴逼抑至此新豐一縣撤民廬千
九百區夷墓揚骨虛張頃畝流毒居民乞罷經理及
冒括田租制曰可庚子改遼陽省泰州為泰寧府壬
寅增國子生百員歲貢伴讀四員詔江洲行省印農
桑輯要萬部頒降有司遵守勸課旌表貴州達魯花
赤相兀孫妻脫脫真死節仍俾樹碑任所九月丁未

張驢以括田逼死九人敕吏部尚書王居仁等鞠之
己酉太陰犯房甲寅日色如赭辛酉太白犯左執法
壬戌蔡五九衆潰伏誅餘黨悉平敕賞軍士討捕功
并官其死事者子孫己巳徙曲尤倉於赤斤之地賜
諸王別鐵木兒永昌路及西涼州田租冬十月丙子
朔客星見太微垣丁丑封脫火赤為威寧郡王賜金
印忽兒赤鐵木兒不花為趙國公庚辰以淮西廉訪
使郭貫為中書參知政事壬午有事于太廟給雲南
廉訪司公田乙未陞同知樞密院事鐵木兒脫知樞
密院事授白雲宗主沈明仁榮祿大夫司空丁酉加

授鐵木迭兒太師癸卯八百媳婦孿遣使獻馴象二
賜以幣帛十一月丙午客星變為彗犯紫微垣歷軫
至壁十五宿明年二月庚寅乃滅辛未以星變赦天
下減免各路差稅有差甲戌封和世球為周王賜金
印左丞相合散等言彗星之異由臣等不才所致願
避賢路帝曰此朕之愆豈卿等所致其復乃職苟政
有過差勿憚於改凡可以安百姓者當悉言之庶上
下交修天變可弭也十二月戊寅賜雲南行省參政
汪長安虎符預軍政庚寅增置平江路行用庫癸巳
給鈔買羊馬賑北邊諸軍命省臣定擬封贈通例俾
高下適宜以聞旌表汀州寧化縣民賴祿孫孝行
三年春正月乙巳漢陽路饑出米賑之特授昔寶赤
八刺合孫達魯花赤脫歡金紫光祿大夫太尉仍給
印丙午封前中書左丞相忽魯荅兒壽國公增置晉
王部斷事官四員都水太監二員省卿一員以真定
保定荐饑禁畋獵改直沽為海津鎮辛酉陞同知樞
密院事買間知院事壬戌賜上都開元寺江淞田二
百頃華嚴寺百頃賜趙王阿魯禿部鈔二萬錠二月
丁丑調海口屯諸漢軍千人隸臨清運糧萬戶府以
供轉漕給鈔二千錠戊寅命湖廣行省諭安南歸占

城國主置安遠王醜漢王傅河間濟南濱棣等處饑
給糧兩月三月辛亥特授高麗王世子王暉開府儀
同三司潘王加授將作院使呂天麟大司徒甲寅敕
蕭拜住及陝西四川省臣各一員護送周王之雲南
置周王常侍府秩正二品設常侍七員中尉四員諮
議記室各二員置打捕鷹坊民匠總管府設官六員
斷事官八員延福司飲膳署官各六員並隸周王常
侍府辛酉陞太史院秩正二品癸亥車駕幸上都壬
申鷹坊孛羅等擾民於大同敕拘還所奉璽書禁天
下春時畋獵夏四月癸酉朔賜皇姊大長公主鈔五
千錠幣帛二百匹河南流民羣聚渡江所過擾害命
行臺廉訪司以見貯贓鈔賑之橫州徃蠻爲寇命湖
廣省發兵討捕壬午諭中書省歲給衛王阿木哥鈔
萬錠敕衛輝昌平守臣修殷比干唐狄仁傑祠歲時
致祭戊子陞印經提舉司爲廣福監己丑陞會福院
秩正二品癸巳賜安遠王醜漢金各五百兩鈔千錠
幣帛二十四匹己亥增置周王斷事官二員以淮東廉
訪司僉事苗好謙善課民農桑賜衣一襲庚子以上
都留守憨刺合兒知樞密院事陞殊祥院秩正二品
命中書省與御史臺翰林集賢院集議封贈通制著

為令遼陽蓋州及南豐州饑發廩賑之五月甲辰至
戊申日赤如赭辛亥以江西行省右丞相斡赤為大
司徒庚申以大都留守伯鐵木兒為中書平章政事
陞中書右丞蕭拜住為平章政事左丞阿卜海牙為
右丞參政郭貫為左丞參議不花為參知政事庚午
置甘肅儒學提舉司遼陽金銀鐵冶提舉司秩並從
五品賜諸王迭里哥兒不花等金三百五十兩銀一
千二百兩鈔三千二百錠幣帛有差潭永寶慶桂陽
澧道表等路饑發米賑糶六月乙亥制封孟柯父為
邾國公母為邾國宣獻夫人改諸王功臣分地郡邑

同知縣丞為副達魯花赤中下縣及錄事司增置副
達魯花赤一員丙子融賔柳州徃蠻叛命湖廣行省
遣官督兵捕之丁丑敕大辟罪臨刑敢有橫加剗割
者以重罪論凡鞠囚非強盜毋加酷刑戊寅吳王朶
列納等部乏食賑糧兩月己卯詔諭百司各勤其職
毋墮廢大政甲申給安遠王醜漢分樞密院印丁亥
封床兀兒為句容郡王丁酉賜周王從衛鈔四十萬
錠河決汴梁沒民居遼陽之蓋州饑並發糧賑之秋
七月壬子命御史大夫伯忽脫歡荅刺罕極治臺綱
仍降詔宣諭中外乙卯封玉龍鐵木兒為保息王賜

金印辛酉賜普慶寺益都田百七十頃丙寅復以燕
鐵木兒知樞密院事庚午發高麗女直漢軍千五百
人於濱州遼河慶雲趙州屯田八月癸酉以兵部尚
書乞塔爲中書參知政事己卯車駕至自上都戊戌
置織佛像工匠提調所秩七品設官二員九月辛丑
復五條河屯田以中書左丞郭貫爲集賢大學士集
賢大學士王毅爲中書左丞庚戌割上都宣德府奉
聖州懷來縉山二縣隸大都路改縉山縣爲龍慶州
帝生是縣特命改焉癸丑太白晝見己未翼寧晉寧
路地震丙寅太白經天冬十月辛未以江南行臺侍

御史高昉爲中書參知政事壬申有事于太廟調四
川軍二千人雲南軍三千人烏蒙等處屯田置總管
萬戶府秩正三品設官四員隸雲南省壬午河南路
地震甲申太白犯斗庚寅敕五臺靈鷲寺置鐵冶提
舉司乙未賜幽王南忽里部鈔四萬錠丁酉修甘州
城申禁民有父在者不得私貸人錢及鬻墓木甘州
肅州等路饑免田租十一月壬寅命監察御史監治
嶺北鈎校錢糧半歲更代大萬寧寺住持僧米普雲
濟以所佩國公印移文有司紊亂官政敕禁止之乙
巳增集寧砂井淨州路同知府判提控案牘各一員

乙卯改舊運糧提舉司為大都陸運提舉司新運糧
提舉司為京畿運糧提舉司澧州路安撫司為安定
軍民府十二月庚午以知樞密院事禿忽魯為陝西
行省左丞相壬午授嗣漢三十九代天師張嗣成太
玄輔化體仁應道大真人主領三山符籙掌江南道
教事丁亥立皇子碩德八剌為皇太子兼中書令樞
密使授以金寶告天地宗廟陞同知樞密院事床兀
兒知樞密院事諸王按灰部乏食給米三千一百八
十六石濟之

本紀卷第二十五

本紀卷第二十六

元史二十六

翰林學士帝矣知制誥兼修國史泉瀛翰林持制承直郎同知制誥兼修國史院編修官臣王權等奉
勅修

仁宗三

四年春正月庚子帝謂左右曰中書比奏百姓乏食
宜加賑恤朕默思之民飢若此豈政有過差以致然
歟向詔百司務遵世祖成憲宜勉力奉行輔朕不逮
然嘗思之唯省刑薄賦庶使百姓各遂其生也乙卯
諸王脫脫駐雲南擾害軍民以按灰代之丙辰以知
樞密院事完者為雲南行省平章政事己未給帝師

乙卯改舊運糧提舉司爲大都陸運提舉司新運糧
提舉司爲京畿運糧提舉司澧州路安撫司爲安定
軍民府十二月庚午以知樞密院事禿忽魯爲陝西
行省左丞相壬午授嗣漢三十九代天師張嗣成太
玄輔化體仁應道大真人主領三山符籙掌江南道
教事丁亥立皇子碩德八剌爲皇太子兼中書令樞
密使授以金寶告天地宗廟陞同知樞密院事床兀
兒知樞密院事諸王按灰部乏食給米三千一百八
十六石濟之

本紀卷第二十五

本紀卷第二十六

元史二十六

翰林學士聶奎知制誥纂修國史兼翰林持制承直郎同知制誥國史院編修官臣王權等奉
勅修

仁宗三

四年春正月庚子帝謂左右曰中書比奏百姓乏食
宜加賑恤朕默思之民飢若此豈政有過差以致然
歟向詔百司務遵世祖成憲宜勉力奉行輔朕不逮
然嘗思之唯省刑薄賦庶使百姓各遂其生也乙卯
諸王脫脫駐雲南擾害軍民以按灰代之丙辰以知
樞密院事完者爲雲南行省平章政事己未給帝師

寺廩食鈔萬錠壬戌奠寧路地震戊辰給諸王也速
也不干明安荅兒部糧三月閏月庚辰封諸王孛羅
爲異王丙戌以立皇太子詔天下給賜鰥寡孤獨鈔
減免各路租稅有差賜諸王宗戚朝會者金三百兩
銀二千五百兩鈔四萬三千九百錠辛卯封別鐵木
兒爲汾陽王壬辰給幽王南忽里部鈔十二萬錠買
馬汴梁揚州河南淮安重慶順慶襄陽民皆飢發廩
賑之二月庚子賜諸王買閭部鈔三萬錠甲辰敕郡
縣各社復置義倉戊申特授近侍完者不花翰林侍
讀學士知制誥同修國史癸亥陞泰寧府爲泰寧路

仍置泰寧縣乙丑陞蒙古國子監秩正三品賜銀印
丙寅以諸王部值脫火赤之亂百姓貧乏給鈔十六
萬六千錠米萬石賑之曹州水免今年租三月丁卯
朔陞靖州爲路庚午給趙王阿魯禿部糧四千石乙
酉太陰犯箕辛卯車駕幸上都夏四月戊戌給安王
兀都思不花部軍糧三月己亥德安府旱免屯田租
壬寅加授太常禮儀院使拜住大司徒賜趙王阿魯
禿金五十兩銀五百兩鈔千錠割懷來縣隸龍慶州
甲辰以太寧路隸遼陽省戊申荅合孫寇邊吳王朶
列納等敗之于和懷賜金玉束帶黃金幣帛有差已

未諸王紐憐薨乙丑禁嶺北酒帝嘗夜坐謂侍臣曰
雨暘不時柰何蕭拜住對曰宰相之過也帝曰卿不
在中書耶拜住惶愧頃之帝露香默禱既而大雨左
右以雨衣進帝曰朕爲民祈雨何避焉翰林學士承
旨忽都魯都兒迷失劉賡等譯大學衍義以進帝覽
之謂群臣曰大學衍義議論甚嘉其令翰林學士阿
憐鐵木兒譯以國語五月辛未授上都留守濶濶出
開府儀同三司大司徒壬申賜出征諸王醜漢等金
銀鈔幣有差乙亥加封大長公主忙哥台爲皇姑大
長公主給金印戊寅改衛率府爲中翊府壬午黃州

高郵真州建寧等處流民群聚持兵抄掠敕所在有
司其傷人及盜者罪之餘並給糧遣歸以翰林學士
承旨赤因鐵木兒爲中書平章政事
中書平章兀伯都刺爲集賢大學士己丑陞中書左丞阿卜海牙爲
平章政事參政乞塔爲右丞高昉爲左丞參議中書
省事換注張思明並參知政事六月乙巳太陰犯心
內外監察御史四十餘人劾鐵木造兒姦貪不法戊
申鐵木迭兒罷以左丞相合散爲中書右丞相己酉
兀伯都刺復爲中書平章政事壬子以工部尚書王
桂爲中書參知政事安遠王醜漢趙王阿魯禿爲叛

王脫火赤所掠各賜金銀幣帛丙辰敕諸王駙馬功臣分地仍舊制自辟達魯花赤丁巳安南國遣使來貢戊午置冀王孛羅王傳二員中尉司馬各一員都總管府秩正三品己未給嶺北行省經費鈔九十萬錠雜絲五萬匹癸亥禁總攝沈明仁所佩司空印毋移文有司秋七月乙亥李孟罷以江浙行省左丞王毅爲中書平章政事庚辰賜皇姑大長公主忙哥台金百兩銀千兩鈔二千錠幣帛各百匹賞討叛王有功句容郡王床兀兒等金銀幣帛鈔各有差壬午敕赤因鐵木兒頒賚諸王駙馬及賑濟所部貧乏特授

中衛親軍都指揮使孛蘭奚太尉己丑成紀縣山崩土石潰徙壞田稼廬舍壓死居民辛卯冀寧路地震帝諭省臣曰比聞蒙古諸部困乏徃徃鬻子女於民家爲婢僕其命有司贖之還各部帝出見衛士有弊衣者駐馬問之對曰戍守邊鎮餘十五年以故貧耳帝曰此輩久勞于外留守臣未常以聞非朕親見何由知之自今有類此者必言於朕因命賜之錢帛八月丙申車駕至自上都熒惑犯輿鬼壬子太陰犯昴庚申合散奏事畢帝問曰卿等日所行者何事合散對曰臣等第奉行詔旨而已帝曰卿等何嘗奉行朕

旨雖祖宗遺訓朝廷法令皆不遵守夫法者所以辨
上下定民志自古及今未有法不立而天下治者使
人君制法宰相能守而勿失則下民知所畏避綱紀
可正風俗可厚其或法弛民慢怨言並興欲求治安
豈不難哉九月丙寅合散言故事丞相必用蒙古勳
臣合散回回人不厭人望遂懇辭制以宣徽使伯荅
沙爲中書右丞相合散爲左丞相己巳大都南城產
嘉禾一莖十一穗庚午太陰犯斗壬辰詔戒飭海漕
諭諸司毋得沮撓嶺北地震三日冬十月甲午朔有
事于太廟戊戌給諸王冕火鐵木兕等部糧五千石

壬寅敕刑部尚書舉林栢監大都兵馬司防遏盜賊
仍嚴飭軍校制其出入遣御史大夫伯忽參知政事
王桂祭陝西嶽鎮名山賑恤秦州被災之民己酉監
察御史言官吏丁憂起復人情驚惑請禁止以絕僥
倖惟朝廷耆舊特旨起復者不在禁例制曰可給兩
淮屯田總管府職田壬子給鈔五萬錠糧五萬石賑
察罕腦兒戊午海外婆羅公之民徃賈海番遇風濤
存者十四人漂至温州永嘉縣敕江浙省資遣還鄉
改潮州路所統梅州隸廣東道宣慰司十一月己卯
復浚揚州運河己丑併汧源縣入隴州壬辰諭諸宿

衛入直各居其次非有旨不得上殿闌入禁中者坐罪大臣許從二人他官一人門者譏其出入十二月丁酉復廣州採金銀珠子都提舉司秩正四品官三員乙巳置詹事院從一品太子詹事四員副詹事詹事丞並二員家令府延慶司設官並四員典寶監八員遣官即興和路及淨州發廩賑給北方流民己酉盧溝橋澤畔店瑠璃河並置巡檢司壬子置安王王傅丁巳賜諸王禿滿鐵木兒等及駙馬忽刺兀帶各部金一千二百兩銀七千七百兩鈔一萬七千七百錠幣帛二千匹以內宰領延福司事禿滿迭兒知樞

密院事特授晉王內史按攤出金紫光祿大夫魯國公辛酉改怯憐口民匠總管府為繕用司

五年春正月辛未賜諸王禿滿鐵木兒等所部鈔四萬錠甲戌懿州地震丙子安南國遣其臣尹世才等以方物來貢乙酉敕諸王位下民在大都者與民均役丁亥會試進士湖廣平章買住加魯國公大司農賑晉王也孫鐵木兒等部貧乏者二月癸巳朔日有食之和寧路地震丁酉敕廣寧開元等萬戶府軍入侍衛有兄弟子姪五人者三人留四人三人者二人留著為籍秦州泰安縣山崩封諸王晃火鐵木兒為

嘉王禿滿鐵木兒爲武平王並賜印丁未敕雲南四
川歸還所侵順元宣撫司民地戊申陞內史府秩正
二品建鹿頂殿于文德殿後辛亥敕杭州守臣春秋
祭淮安忠武王伯顏祠王子諸王荅失蠻部乏食敕
甘肅行省給糧賑之賜諸王察吉兒鈔萬錠甲寅置
寧昌府乙卯命中書省汰不急之役增置河東宣慰
司副使一員敕上都諸寺權豪商販貨物並輸稅課
戊午以者連怯耶兒萬戶府爲右衛率府給書西天
字維摩經金三千兩庚申罷封贈賞討叛王脫火赤
戰功賜諸王部察罕等金銀幣鈔有差三月戊辰御

試進士賜忽都達兒霍希賢以下五十人及第出身
有差己巳賜寧海王八都兒金印庚午立諸王幹羅
溫孫部打捕鷹坊諸色人匠怯憐口總管府秩從四
品改靜安路爲德寧路靜安縣爲德寧縣癸酉晉王
也孫鐵木兒部貧乏賑米四千一百五十石仍賜鈔
二萬錠買十羊孳畜乙亥增給兩淮運司分司印一
特授安遠王醜漢開府儀同三司錄軍國重事知樞
密院事戊寅以湖州路爲安王元都思不花分地其
戶數視衛王阿木哥癸未和寧淨州路禁酒賜鈔萬
錠命晉王也孫鐵木兒賑濟遼東貧民晉王內史拾

得間加榮祿大夫封桓國公給金九百兩銀百五十兩書金字戲經甲申免鞏昌等處經賑濟者差稅鹽課乙酉御史臺臣言諸司近侍隔越中書間奏者請如舊制論罪制曰可己丑敕以紅城屯田米賑淨州平地等處流民置汾陽王別鐵木兒王傅四貞賜醜駙荅刺罕平江路田百頃夏四月壬辰安吉王乞台普濟薨丁酉諸王雍吉刺部乏食賑米三千石己亥耽羅捕獵戶成金等為寇救征東行省督兵捕之庚子賜諸王祭吉兒部鈔萬錠布帛稱是給中朔府閭臺順州屯田鈔萬錠置牛種農具庚戌敕安遠王醜

漢分地隸建寧者七縣汀州者三縣達魯花赤聽其自辟陞印經提舉司為延福監秩正三品遣官分汰各部流民給糧賑濟免懷孟河南南陽居民所輸陝西鹽課是時解州鹽池為水所壞命懷孟等處食陝西紅鹽後以地遠改食滄鹽而仍輸課陝西民不堪命故免之木鄰鐵里干驛困乏濟以馬五千匹遼陽飢海漕糧十萬石於義錦州以賑貧民甲寅樞密院臣言各省調度軍馬惟長官二人領其事今四川省諸臣皆預非便請如舊制從之以千奴史弼並為中書平章政事侍御史敬儼為中書參知政事戊午車

駕辛上都五月辛酉朔順元等處軍民宣撫使阿書以洞蠻酋黑冲子子昌奉方物來覲丁卯賜安王元都思不花金五十兩銀五千兩以御史中丞亦列赤爲中書右丞相戊辰遣平章政事王毅祭星于司天台三晝夜諸王按塔木兒不顏鐵木兒部之食賑糧兩月壬申監察御史言比年名爵冒濫太尉司徒國公接跡于朝昔奉詔裁罷中外莫不欣悅近聞禮部奉旨鑄太尉司徒司空等印二十有六此輩無功於國載在史冊貽笑將來請自今門閥貴重勲業昭著者存留一二餘並革去制曰可癸酉遣官分道咸決

答以下罪己卯德慶路地震肇昌隴西縣大雨南土山崩壓死居民給糧賑之六月辛卯御史臺臣言昔遣張驢等經理江浙江西河南田糧虛增糧數流毒生民已嘗奉旨俟三年徵租今及其期若江浙江西當如例輸之其河南請視鄉例減半徵之制曰可癸巳以典瑞院使幹赤爲集賢大學士領典瑞院事大司徒己亥北地諸部軍士乏食給糧賑之庚子遣阿尼八都兒只兒海分汰淨州北地流民其隸四宿衛及諸王駙馬者給資糧遣還各部癸卯賜諸王桑哥班金束帶一銀百兩鈔五百錠乙巳術者趙子玉等

元史卷之二十一
七人伏誅時衛王阿木哥以罪貶高麗子玉言於王
府司馬曹脫不台等曰阿木哥名應圖讖於是潛謀
備兵器衣甲旗鼓航海往高麗取阿木哥至大都俟
時而發行次利津縣事覺誅之西蕃土寇作亂救甘
肅省調兵捕之丁巳賜安王兀都思不花等金束帶
及金二百兩銀一千五十兩鈔二千二百錠幣帛二
百八十四匹秋七月己未朔李邦寧加開府儀同三司
癸亥賜諸王八里帶等金二百兩銀八百五十兩鈔
二千錠幣帛二百匹甲子給欽察衛馬羊價鈔一十
四萬五千九百九十二錠丙寅調軍五千烏蒙等處

屯田置總管萬戶府秩正三品給銀印丁卯給鈔二
十萬錠糧萬石命晉王分賚所部宿衛士壬申御史
中丞趙簡言皇太子春秋鼎盛宜選耆儒敷陳道義
今李銓侍東宮說書未諳經史請別求碩學分進講
讀實宗社無疆之福制曰可諸王不里牙敦之叛諸
王也舍失列吉及衛士朶帶伯都坐持兩端不助官
軍進討敕流也舍江西失列吉湖廣朶帶衡州伯都
潭州癸酉拘衛王阿木哥王傳印置籛廩司秩正八
品隸上都留守司豐州石泉店置巡檢司賜諸王別
失帖木兒等金銀并賑其部米萬石鈔萬錠己卯諸

王雍吉刺帶曲春鐵木兒來朝賜金二百兩銀一千兩鈔五千錠幣帛一百匹仍給鈔萬錠米萬石分贍其所部辛巳立受給庫秩九品隸工部壬午罷河南省左丞陳英等所括民田止如舊例輸稅戊子鞏昌路寧遠縣山崩加封楚三閭大夫屈原爲忠節清烈公八月戊子車駕至上都乙卯併翁源縣入曲江縣九月癸亥大司農買住等進司農丞苗好謙所撰栽桑圖說帝曰農桑衣食之本此圖甚善命刊印千帙散之民間丙寅廣西兩江龍州萬戶趙清臣太平路總管李興隆率土官黃法扶何凱並以方物來貢

賜以幣帛有差幽王南忽里等部貧乏命甘肅省市馬萬匹給之丁卯中書右丞宣徽使亦列赤爲中書平章政事左丞高昉爲右丞參知政事換住爲左丞吏部尚書燕只干爲參知政事壬申以鈔給北邊軍爲馬價甲戌以作佛事釋重囚三人輕囚五十三人已卯以江浙省所印大學衍義五十部賜朝臣辛巳置大永福寺都總管府秩三品壬午敕軍官犯罪行省咨樞密院議擬毋擅決遣丙戌以僉太常禮儀院事狗兒爲中書參知政事丁亥立行宣政院于杭州設官八員大同路金城縣大雨雹冬十月己丑以大

寧路隸遼陽省宣德府隸大都路敕僧人除宋舊有
及朝廷撥賜土田免租稅餘田與民一體科徵播州
南寧長官洛麼作亂思州守臣換住哥招諭之洛麼
遣人以方物來覲罷膠萊莒密鹽使司復立濤洛場
辛卯禁大同冀寧晉寧等路釀酒壬辰建帝師巴思
八殿於大興教寺給鈔萬錠癸巳改中翊府爲羽林
親軍都指揮使司甲午有事于太廟癸丑贛州路雲
都縣里昏劉景周以有司徵括田新租聚衆作亂敕
免徵新租招諭之十一月辛酉開成莊浪等處禁酒
壬戌改黃花嶺屯儲軍民總管府爲屯儲總管府設

官四員山後民飢增海漕四十萬石增置大都南北
兩兵馬司指揮使色目漢人各二員給分司印二丁
卯用監察御史乃蠻帶等言追奪建康富民王訓等
白身濫受宣敕仍禁冒籍貫宿衛及巧受遠方職官
不赴任求別調者隱匿不自首者罪之己巳陞同知
樞密院事忠嘉知樞密院事丙子集賢大學士太保
曲出言唐陸淳著春秋纂例辨疑微旨三書有益後
學請令江西行省餼梓以廣其傳從之癸未敕江西
茶運司歲課以二十五萬錠爲額敕大永福寺創殿
安奉順宗皇帝御容十二月壬辰特授集賢大學士

元史卷之三十三
三
脫列大司徒辛亥置重慶路江津巴縣等處屯田省
成都歲漕萬二千石甲寅敕樞密院覈實蒙古軍貧
乏者存卹五年

六年春正月丁巳朔暹國遣使奉表來貢方物丁卯
敕福建兩廣雲南甘肅四川軍官致仕還家官給驛
傳如民官例戊辰賑晉王部貧民癸酉特授同知徽
政院事醜驢荅刺罕金紫光祿大夫太尉給銀印甲
戌監察御史孛朶魯朶等言皇太子位正東宮既立
詹事院以總家政宜擇年德老成道義崇重者為師
保賓贊俾盡心輔導以廣緝熙之學制曰可戊寅太

陰犯心己卯崇星于司天臺廣東南恩新州徃賊龍
郎庚等為寇命江西行省發兵捕之帝御嘉禧殿謂
扎魯忽赤買間曰扎魯忽赤人命所繫其詳閱獄辭
事無大小必謀諸同僚疑不能決者與省臺臣集議
以聞又顧謂侍臣曰卿等以朕居帝位為安邪朕惟
太祖創業艱難世祖混一疆宇兢業守成恒懼不能
當天心繩祖武使萬方百姓樂得其所朕念慮在茲
卿等固不知也二月丁亥朔日有食之改釋奠于中
丁祀社稷于中戊崇星于回回司天臺丁酉雲南閣
里愛俄永昌蒲蠻阿八刺等並為寇命雲南省從宜

元史本紀卷二十六
勤捕戊戌改陝西轉運鹽使司爲河東陝西都轉運
鹽使司直隸省部己亥太陰犯靈臺乙巳敕諸司不
由中書奏官輒署事者悉罷之特授僧從吉祥榮祿
大夫大司空加榮祿大夫大司徒僧文吉祥開府儀
同三司三月丁巳以天壽節釋重囚一人乙未給鈔
賑濟上都西番諸驛辛酉斡端地有叛者入寇遣鎮
西武靖王搠思班率兵討之詔以御史中丞禿禿合
爲御史大夫諭之曰御史大夫職任至重以卿勲舊
之裔故特授汝當思乃祖乃父忠勤王室仍以古名
臣爲法否則將墜汝家聲負朕委任之意矣丙寅改

懷孟路爲懷慶路特授翰林學士承旨八兒思不花
開府儀同三司大司徒己巳太陰犯明堂敕諸王駙
馬宗姻諸事依舊制領於內八府官勿徑移文中書
封諸王月魯鐵木兒爲恩王給印置王傳官免大都
上都興和大同今歲租稅癸酉太陰犯日星甲戌太
陰犯心壬午賜大興教寺僧齋食鈔二萬錠禁甘肅
行省所屬郡縣釀酒夏四月壬辰中書省臣言雲南
土官病故子姪兄弟襲之無則妻承夫職遠方蠻夷
頑獷難制必任土人可以集事今或闕負宜從本俗
權職以行制曰可丙辰命京師諸司官吏運糧輸上

都興和賑濟蒙古飢民庚子車駕幸上都以鐵木迭
兒爲太子太師內外監察御史四十餘人劾其逞私
蠹政難居師保之任不聽諸王合贊薨丙午命宣政
院賑給西番諸驛壬子伯顏鐵木兒部貧乏給鈔賑
之五月辛酉太陰犯靈臺丁卯太陰犯房丙子太陰
犯壘壁陣加安南國王陳益稷儀同三司六月戊子
以莊浪巡檢司爲莊浪縣移巡檢司於比卜渡癸巳
以米五千石賑大長公主所隸貧民甲午改繕珍司
爲徽儀使司秩二品己亥歲星犯東咸辛丑置河南
田賦總管府隸內史府設達魯花赤總管同知各一

員副總管二員秩從三品戊申置勇校署以角觝者
隸之庚戌大同縣雨雹大如雞卵詔以駝馬牛羊分
給朔方蒙古民戍守邊徼者俾牧養蕃息以自贍仍
命議興屯田壬子賜大乾元寺鈔萬錠俾營子錢供
繕修之費仍陞其提點所爲總管府給銀印秩正三
品給鈔四十萬錠賑合刺赤部貧民三十萬錠賑諸
位怯憐口被災者諸有俸祿及能自贍者勿給癸丑
以羽林親軍萬人隸東宮丙子陞廣惠司秩正三品
掌回回醫藥丁丑以濟寧等路水遣官閱視其民乏
食者賑之仍禁酒開河泊禁聽民採食晉陽西涼鈞

等州楊翟新鄭密等縣大雨雹汴梁益都般陽濟南
東昌東平濟寧恭安高唐濮州淮安諸處大水秋七
月丙辰緬國趙欽撒以方物來覲來安路總管岑世
興叛據唐興州賜璽書招諭之諸王闊慳堅部貧乏
給糧賑之壬戌太陰犯心以者連怯耶兒萬戶府軍
萬人隸東宮置右衛率府秩正三品丁卯詔諭江西
官吏豪民毋沮撓茶課甲戌皇姊大長公主祥哥剌
吉作佛事釋全寧府重囚二十七人敕按問全寧守
臣阿從不法仍追所釋囚還獄命分簡奴兒干流囚
罪稍輕者屯田肇州乙亥通州瀋州增置三倉丙子

太白犯太微垣右執法增置上都巡警院開平縣官
各二員己卯晉王也孫鐵木兒所部民經剽掠災傷
為盜者衆敕扎魯忽赤囊加帶往與晉王內史審錄
罪囚重者就啓晉王誅之當流配者加等杖之庚辰
賜木憐麥該兩驛鈔一萬二千一百二十錠俾市馬
給驛辛巳賜左右鷹坊及合刺赤等貧乏者鈔一十
四萬錠八月甲申以河東山西道宣慰使張思明為
中書參知政事乙酉熒惑犯輿鬼甲午以授皇太子
玉冊告祭于南郊庚子車駕至自上都丁未告祭于
太廟是月伏羌縣山崩閏八月丙辰辰星犯太微垣

右執法賜嘉王冕火鐵木兒部羊十萬馬萬匹庚申
增置興和路既備倉秩正八品陞廣盈庫從八品癸
亥熒惑犯軒轅甲子太陰犯壘壁陣浚會通河壬申
以太傅御史大夫伯忽為太師癸酉敕河東山西道
宣慰司官給俸同隨朝敕諸司有受命不之官及避
繁劇託故去職者奪其宣敕乙亥太白犯東咸併永
興縣入奉聖州九月甲申以徽政使朶帶為太傅陞
參議中書省事欽察為叅知政事辛卯鐵里干等二
十八驛被災給鈔賑之壬辰崇星于司天臺癸巳以
作佛事釋大辟囚七人流以下囚六人戊戌增海漕

十萬石置雲南縣隸雲內州以故昌州寶山縣置寶
昌州隸興和路庚子併順德廣平兩鐵冶提舉司為
順德廣平彰德等處鐵冶提舉司癸卯御史臺臣言
比者官以倖求罪以賂免乞凡內外官非勲舊有資
望者不許驟陞諸犯賊罪已款伏及當鞠而幸免者
悉付元問官以竟其罪其貪污受刑奪職不叙者寅
緣近侍出入內庭覬倖名爵宜斥逐之帝皆納其言
詔謂四宿衛嘗受刑者勿令造禁庭山東諸路禁酒
浚鎮江練湖發粟賑濟寧東平東昌高唐德州濟南
益都般陽揚州等路飢十月甲寅省都功德使四貞

止存六負乙卯東平濟寧路水陸十五驛乏食戶給
麥十石中書省臣言白雲宗總攝沈明仁強奪民田
二萬頃誑誘愚俗十萬人私賂近侍妄受名爵已奉
旨追奪請汰其徒還所奪民田其諸不法事宜令覈
問有旨朕知沈明仁姦惡其嚴鞠之戊午遣中書右
丞相伯答沙持節授皇太子王冊辛酉以扎魯忽赤
鐵木兒不花爲御史大夫癸亥熒惑犯太微垣左執
法上都民飢發官粟萬石減價賑糴置兩浙鹽倉六
所秩從八品官二負惟杭州嘉興二倉設官三負秩
從七品鹽場三十四所場設監運一負正八品罷檢

校所乙丑太陰犯昴丁卯賑北方諸驛戊辰太陰犯
東井庚午太白晝見辛未太陰犯軒轅丙子以皇太
子受玉冊詔天下己卯浚通惠河增河東陝西鹽運
司判官一負給分司印二置提領所二秩從八品官
各二負鹽場二增管勾各二負罷漉鹽戶提領二十
人濟南濱棣州章丘等縣水免其田租十一月辛卯
熒惑犯進賢木邦路帶邦爲寇敕雲南省招捕之乙
巳以秘書卿苦思丁爲大司徒庚子敕晉王部貧民
二千居稱海屯田增京畿漕運司同知副使各一負
給分司印中書省臣言曩賜諸王阿只吉鈔三萬錠

使營子錢以給畋獵廩膳毋取諸民今其部阿魯忽等出獵恣索於民且爲姦事宜令宗正府刑部訊鞠之以正典刑制曰可禁民匿蒙古軍亡奴帝諭臺臣曰有國家者以民爲本比聞百姓疾苦啣冤者衆其令監察御史廉訪司審察以聞河間民飢發粟賑之十二月壬戌命皇太子參決國政封宋儒周惇頤爲道國公甲子遣宗正府扎魯忽赤二員審決興和平地等處獄囚省雲南大理大小徼里等地同知相副官及儒學蒙古教授等官百二十四員丙寅太陰犯軒轅己巳復吏人出身舊制其犯賊者止從七品免

大都上都興和延祐七年差稅河西塔塔刺地置屯田立軍民萬戶府壬申太陰犯心平章政事王毅以親老辭職從之仍賜其父幣帛癸酉是夜風雪甚寒帝謂侍臣曰朕與卿等居暖室宗戚昆弟遠戍邊陲曷勝其苦歲賜錢帛可不徧及耶敕上都大都冬夏設食于路以食飢者

七年春正月辛巳朔日有食之帝齋居損膳輟朝賀壬午御史臺臣言比賜不兕罕丁山場完者不花海舶稅會計其鈔皆數十萬錠諸王軍民貧乏者所賜未嘗若是苟不撙節漸致帑藏虛竭民益困矣中書

省臣進曰臺臣所言良是若非振理朝綱法度愈壞
臣等乞賜罷黜選任賢者帝曰卿等不必言其各共
乃事癸未帝御大明殿受諸王百官朝賀辛卯江浙
行省丞相黑驢言白雲僧沈明仁擅度僧四千八百
餘人獲鈔四萬餘錠既已辭伏今遣其徒沈崇勝潛
赴京師行賄求援請逮赴江浙併治其罪從之乙未
太陰犯明堂上星丁亥帝不豫辛丑帝崩于光天宮
壽三十有六在位十年癸卯葬起輦谷從諸帝陵五
月乙未羣臣上謚曰聖父欽孝皇帝廟號仁宗國語
曰普顏篤皇帝仁宗天性慈孝聰明恭儉通達儒術
妙悟釋典嘗曰明心見性佛教爲深脩身治國儒道
爲切又曰儒者可尚以能維持三綱五常之道也平
居服御質素澹然無欲不事遊畋不喜征伐不崇貨
利事皇太后終身不違顏色待宗戚勳舊始終以禮
大臣親老時加恩賚太官進膳必分賜貴近有司奏
大辟每慘惻移時其孜孜爲治一遵世祖之成憲云

本紀卷第二十六

本紀卷第二十七

元史二十七

翰林學士雷大知制誥兼修國史臣宋濂
翰林侍制承直郎兼國史院編修官臣王禕等奉
敕修

英宗一

英宗睿聖文孝皇帝諱碩德八剌仁宗嫡子也母莊懿慈聖皇后弘吉剌氏以大德七年二月甲子生仁宗欲立為太子帝入謁太后固辭曰臣幼無能且有兄在宜立兄以臣輔之太后不許延祐三年十二月丁亥立為皇太子授金寶開府置官屬監察御史段輔太子詹事郭貫等首請近賢人擇師傳帝嘉納之

六年十月戊午受玉冊詔命百司庶務必先啓太子然後奏聞帝謂中書省臣曰至尊委我以天下事日夜寅畏惟恐弗堪卿等亦當洗心滌慮恪勤乃職勿有隳壞以貽君父憂七年春正月戊戌仁宗不豫帝憂形于色夜則焚香泣曰至尊以仁慈御天下庶績順成四海清晏今天降大厲不如罰殛我身使至尊永爲民主辛丑仁宗崩帝哀毀過禮素服寢于地日歔一粥癸卯太陰犯斗甲辰太子太師鐵木迭兒以太后命爲右丞相丙午遣使分讞內外刑獄戊申賑通瀛二州蒙古貧民汰知樞密院事四貞禁巫祝日

者交通宗戚大官二月壬午罷造永福寺賑大同豐州諸驛饑以江浙行省左丞相黑驢爲中書平章政事丁巳修佛事戊午祭社稷建御容殿于永福寺汰富民竄名宿衛者給役蒙古諸驛己未命儲糧于宣德開平和林諸倉以備賑貸供億復以都水監隸中書辛丑太陰犯軒轅御女平章政事赤斤鐵木兒御史大夫脫歡罷爲集賢大學士壬戌太陰犯靈臺甲子鐵木迭兒阿散請捕逮四川行省平章政事趙世延赴京叅議中書省事乞失監坐鬻官刑部以法當杖太后命答之帝曰不可法者天下之公徇私而輕

重之非示天下以公也卒正其罪丙寅以陝西行省
平章政事趙世榮爲中書平章政事江西行省右丞
木八刺爲中書右丞叅知政事張思明爲中書左丞
中書左丞換住罷爲嶺北行省右丞丁卯太陰犯日
星白雲宗攝沈明仁爲不法坐罪詔籍江南冒爲白
雲僧者爲民已巳修鎮雷佛事于京城四門罷上都
乾元寺規運總管府庚午太陰犯斗辛未括民間係
官山塲河泊窑冶廬舍壬申召陝西行臺御史大夫
杏失鐵木兒赴闕以遼陽大同上都甘肅官牧羊馬
牛駝給朔方民戶仍給曠地屯種祭酉括勘崇祥院

地其冒以官地獻者追其直以民地獻者歸其主決
開平重囚丙子定京城環衛更番法准五衛漢軍歲
例丁丑奪前中書平章政事李孟所受秦國公制命
仍什其先墓碑戊寅中書平章政事兀伯都刺罷爲
甘肅行省平章政事阿禮海牙罷爲湖廣行省平章
政事鐵木迭兒以前御史中丞楊朶兒只中書平章
政事蕭拜住違太后旨矯命殺之並籍其家徵政院
使失列門以太后命請更朝官帝曰此豈除官時耶
且先帝舊臣豈宜輕動俟予即位議于宗親元老賢
者任之邪者黜之可也司農卿完者不花言先帝以

元史本紀卷二十七
土田頒賜諸臣者宜悉歸之官帝問曰所賜爲誰對
曰左丞相阿散所得爲多帝曰予常諭卿等當以公
心輔弼卿於先朝嘗請海舶之稅以阿散奏而止今
卿所言乃復私憾耳非公議也豈輔弼之道耶遂出
完者不花爲湖南宣慰使奪僧輦真吃刺思等所受
司徒國公制仍銷其印三月辛巳以中書禮部領教
坊司壬午賑陳州嘉定州饑爪哇遣使入貢戊子太
陰犯酒旗上星熒惑犯進賢徵諸王駙馬流竄者給
侍從遣就分邑庚寅帝即位詔曰洪惟太祖皇帝膺
期撫運肇開帝業世祖皇帝神機睿略統一四海以

聖繼聖迨我先皇帝至仁厚德溷濡群生君臨萬國
十年于茲以社稷之遠圖定天下之大本叶謀宗親
授予冊寶方春宮之興政遽昭考之賓天諸王貴戚
元勳碩輔咸謂朕宜體先帝付託之重皇太后擁護
之慈旣深繫於人心詎可虛於神器合辭勸進誠意
交孚乃於三月十一日即皇帝位于大明殿可赦天
下尊太后爲太皇太后是夜太陰犯明堂壬辰太皇
太后受百官朝賀于興聖宮織木迭兒進開府儀同
三司上柱國太師敕群臣超授散官者朝會毋越班
次賜諸王也孫鐵木兒脫脫那顏等金銀幣帛有差

賑寧夏路軍民饑甲午作佛事於寶慈殿賑木憐渾
都兒等十一驛饑乙未日有暈者連環丙申斡羅思
等內附賜鈔萬四千貫遣還其部遣知樞密事也兒
吉尼檢覈鞏昌等路屯戍選甘州戍卒戍汰上都
留守司留守五員定吏員秩止從七品如前制庚子
降太常禮儀院通政院都護府崇福司並從二品蒙
古國子監都水監尚乘寺光祿寺並從三品給事中
闡遺監尚舍寺司天監並正四品其官遞降一等有
差七品以下不降賜邊戍諸王駙馬及將校士卒金
銀幣帛有差市羊五十萬馬十萬贍北邊貧乏者辛

丑禁擅奏璽書以樞密院兼領左右衛率府壬寅降
前中書平章政事李孟為集賢侍講學士悉奪前所
受制命御史臺臣請降詔諭百司以肅臺綱帝曰卿
等但守職盡言善則朕當服行否亦不汝罪也甲辰
詔中外毋沮議鐵木迭兒敕能醫卜工匠任子其藝
精絕者擇用之丙午有事於南郊告即位丁未罷崇
祥院以民匠都總管府隸將作院夏四月庚戌有事
于太廟告即位追奪佛速司徒官罷少府監復儀鳳
教坊廣惠諸司品秩罷行中書省丞相河南行省丞
相也先鉄木兒湖廣行省丞相朶兒只的斤遼陽行

元史卷三十七
五
省丞相並降為本省平章政事惟征東行省丞相高麗王不降賜諸王鐵木兒不花鈔萬五千貫甲寅太白犯填星乙卯復國子監都水監秩正三品罷回回國子監行通政院封諸王徹徹禿為寧遠王申詔京師勢家與民均役那懷渾都兒驛戶饑賑之戊午祀社稷告即位己未給慶路洞蠻為寇命四川行省捕之祭遁甲神于香山命平章政事王毅等徵理在京諸倉庫糧帛虧額申嚴和林酒禁庚申降百官越階者並依所受之職以太常禮儀院使拜住為中書平章政事以西僧牙八的里為元永延教三藏法師授

金印壬戌太陰犯房以即位賞宿衛軍括馬三萬正給蒙古流民遣還其部給通遼二州蒙古戶夏布鐵木迭兒請參決政務禁諸臣毋隔越擅奏從之乙丑仁宗喪卒哭作佛事七日戊辰車駕幸上都海運至直沽調兵千人防戍封王煦為鷄林郡公議祔仁宗以陰陽拘忌權結綵殿於太室東南以奉神主己巳河間真定濟南等處蒙古軍饑賑之罷市舶司禁賈人下番課回回散居郡縣者戶歲輸包銀二兩增兩淮荆湖江南東西道田賦斗加二升賑大都淨州等處流民給糧馬遣還北邊戊寅以蒙古漢人驛傳復

元史卷三十七
六
隸通政院有獻七寶帶者因近臣以進帝曰朕登大
位不聞卿等薦賢而為人進帶是以利誘朕也其還
之是月左衛屯田旱蝗左翊屯田蟲食麥苗亳州水
五月己卯禁僧馳驛仍收元給璽書庚辰上都留守
賀伯顏坐便服迎詔棄市籍其家辛巳汝寧府霖雨
傷麥禾發粟五千石賑難之丁亥罷沅陵縣浦口千
戶所己丑中書省臣請禁擅奏除拜帝曰然恐朕遺
忘或乘間奏請濫賜名爵汝等當復以聞復置稱海
五條河屯田命僧禱雨大同雲內豐勝諸郡縣饑發
粟萬三千石貸之左丞相阿散罷為嶺北行省平章

政事以拜住為中書左丞相乃剌忽塔失海牙並為
中書平章政事只兒哈郎為中書參知政事庚寅太
陰犯心辛卯參知政事欽察罷為集賢學士賑上都
城門及駐冬衛士遣使推廣東番貸弛陝西酒禁壬
辰和林民間海墜殍死者三千餘人旌其門癸巳太
陰犯天狗甲午瀋陽軍民饑給鈔萬二千五百貫賑
之乙未請大行皇帝謚于南郊丙申太白犯畢禁宗
戚權貴避徭役及作奸犯科戊戌有告嶺北行省平
章政事阿散中書平章政事黑驢及御史大夫脫忒
哈微政使失列門等與故要束謀妻亦列失八謀廢

立拜住請鞠狀帝曰彼若借太皇太后為詞奈何命
悉誅之籍其家追封隴西公汪世顯為隴右王辛丑
以知樞密院事鐵木兒脫為中書平章政事壬寅監
察御史請罷僧道工伶濫爵及建寺豢獸之費甲辰
以誅阿散黑驢賀伯顏等詔天下敕百司日勤政務
怠者罪之丙午御史劉恒請興義倉及奪僧道官敕
捕亦列失八子江浙行省平章政事買驢仍籍其家
丁未封王禪為雲南王往鎮其地饒州番陽縣進嘉
禾一莖六穗以賀伯顏失列門阿散家貲田宅賜鐵
木迭兒等六月己酉流徽政院使米薛迷于金剛山

以脫忒哈失列門故奪人畜產歸其主甲寅前太子詹
事床兀兒伏誅京師疫修佛事于萬壽山乙卯昌王阿
失部饑賜鈔千萬貫賑之賞誅阿散等功賜拜住以下
金銀鈔有差丙辰召河南行省平章政事楚仙帖穆兒
至京師收脫忒哈廣平王印丁巳以江西行省左丞相
脫脫為御史大夫宗正扎魯火赤鐵木兒不花知樞密
院事戊午罷徽政院廣東採珠提舉司罷以有司領其
事封知樞密院事塔失鐵木兒為薊國公己未定邊地
盜孳畜罪犯者令給各部力役如不悛斷罪如內地法
庚申太陰犯斗賜角觥百二十人鈔各千貫辛酉詔免

元史本紀卷三十一
僧人雜役壬戌勅諸使至京者大事五日小事三日遣還
是夜月食既癸亥太陰犯壘壁陣乙丑賑北邊饑民有
妻子者鈔千五百貫孤獨者七百五十貫新作太祖幄殿
西番盜洛各目降丁卯太白犯井賜諸王阿木里台宴
服珠帽戊辰賑雷家驛戶鈔萬五千貫辛未太陰犯昴
甲戌賜北邊諸王伯要台等十人鈔各二萬五千貫邊
民賑米三月修寧夏欽察魯佛事給鈔二百一十二萬貫
丁丑改紅城中都威衛為忠翊侍衛親軍都指揮使司
隸樞密院罷章慶司延福司群牧監宮正司遼陽萬戶
府復徽儀司為繕珍司善政司為都總管府內宰司延

慶司甄用監復為正三品益都蝗荆門州旱棣州高
郵江陵水秋七月戊寅賜諸王曲魯不花鈔萬五千
貫命玄教宗師張留孫修醮事于崇真宮壬午立普
定路屯田分烏撒烏蒙屯田卒二千赴之運和林糧
于扎昆倉以便邊軍市馬三萬羊四萬給邊軍貧乏
者癸未括馬於大同興和興寧三路以頒衛士甲申
車駕將北幸調左右翊軍赴北邊浚井以知樞密院
事買驢哈丹並為遼陽行省平章政事丙戌賜諸王
買奴等鈔二十五萬貫丁亥太陰犯斗諸王告住等
部火賑糧三月鈔萬五千貫晉王也孫鉄木兒部饑

賑鈔五千萬貫壬辰罷女直萬戶府及狗站脫脫禾
孫散遼陽紅花萬戶府兵遣扈從諸營還大都禁踐
民禾安南內附人陳巖言其國貢使多爲覘伺敕湖
廣行省汰遣之乙未賜西僧沙加鈔萬五千貫以甘
肅行省平章欽察知樞密院事回回太醫進藥曰打
里牙給鈔十五萬貫丙申以昌平灤陽十二驛供億
繁重給鈔三十萬貫賑之中書平章政事乃刺忽罷
降封安王兀都不花爲順陽王禁獻珍寶製袞冕戊
戌熒惑犯房樞密院臣言塔海萬戶部不剌兀赤與
北兵戰拔軍士三百人以還弃其子於野殺所乘馬

以啗士卒請賞之賜鈔五千貫幹魯思辰告諸王月
兒魯鐵木兒謀變賞鈔萬五千貫敕中外希賞自請
者勿予己亥太陰犯昴賜女巫伯牙台鈔萬五千貫
庚子以江南行御史臺中丞廉恂爲中書平章政事
辛丑賜公主扎牙八刺等鈔七萬五千貫晉王也孫
鐵木兒遣使以地七千頃歸朝廷請有司徵其租歲
給糧鈔從之以遼陽金銀鐵冶歸中政院癸卯賜伶
人鈔二萬五千貫酒人十五萬貫己巳以知樞密院
事也先吉尼爲江西行省平章政事是月後衛屯田
及潁息汝陽上蔡等縣水霸州及堂邑縣蝻八月丁

未朔嶺北省臣忻都坐以官錢犒軍免官詔復其職
戊申祭社稷罷曲靖路人匠提舉司賑晉王部軍民
鈔二百五十萬貫祭星于司天監辛亥賑龍居河諸
軍乙卯賜上都駐冬衛士鈔四百萬貫諸王木南即
部饑興聖宮牧駝戶貧乏並賑之丙辰祔仁宗聖文
欽孝皇帝若懿慈聖皇后于太廟鐵木迭兒攝太尉
奉王冊行事太白犯靈臺戊午鐵木迭兒以趙世延
嘗劾其姦誣以不敬下獄請殺之并究省臺諸臣不
允帝幸涼亭從容謂近侍曰頃鐵木迭兒必欲寘趙
世延于死地朕素聞其忠良故每奏不納左右咸稱

萬歲乙丑熒惑犯天江丁卯太白犯太微垣右執法
宮人官奴坐用日者請太皇太后崇星杖之籍其資
脫思馬部宣慰使亦憐真坐違制不發兵杖流奴兒
干之地庚午發米十萬石賑糶京師貧民壬申太陰
犯軒轅御女甲戌廣東新州饑賑之河間路水九月
甲申建壽安山寺給鈔千萬貫括興和馬以贍北部
貧民禁五臺山樵採罷上都嶺北甘肅河南諸郡酒
禁乙酉太陰犯壘壁陣丙戌熒惑犯斗壬辰敕議玉
華宮歲享睿宗登歌大樂土番利族阿俄等五種寇
成谷遣鞏昌總帥以兵討之循州溪蠻秦元吉為寇

遣守將捕之癸巳太陰犯昴瀋陽水旱害稼弛其山
場河泊之禁戊戌太陰犯鬼己亥太白犯亢庚子常
澧州洞蠻貞公合諸洞爲寇命土官追捕之癸卯親
王脫不花搠思班遣使來賀登極甲辰雲南木邦路
土官給邦子忙兀等入貢賜幣有差遣馬扎蠻等使
占城占臘龍牙門索馴象以廩截不克停諸王所部
歲給冬十月丁未時享太廟庚戌太陰犯熒惑于斗
將作院使也速坐董製珠衣怠工杖之籍其家壬子
作佛事于文德殿四十日申嚴兩淮鹽禁丁巳酉陽
聳儂洞蠻田謀遠爲寇命守臣招捕之戊午車駕至

自上都詔太常院臣曰朕將以四時躬祀太室宜與
群臣集議其禮此追遠報本之道毋以朕勞於對越
而有所損其悉遵典禮安南國遣其臣鄧恭儉來貢
方物庚申敕譯佛書辛酉賜勞探馬赤宿衛者遣還
所部癸亥太陰犯井乙丑辛大護國仁王寺帝師請
以醮八兒監截爲土蕃宣慰司都元帥從之酉陽土
官舟世昌遣其子舟朝率大小石隄洞蠻入貢丙寅
定恭謝太廟儀式丁卯爲皇后作鹿頂殿于上都己
巳罷玉華宮祀睿宗登歌樂敕翰林院譯詔關白中
書庚午命拜住督造壽安山寺癸酉流諸王阿剌鐵

元史本紀卷二十七
十三
木兒於雲南十一月丙子朔帝御齋宮丁丑恭謝太
廟至仁宗太室即流涕左右感動戊寅以海運不給
命江浙行省以財賦府租益之還其直歸宣徽中政
二院檢勘沙淨二州流民勒還本部以登極大賚諸
王百官中書會其數計金五千兩銀七十八萬兩鈔
百二十一萬一千貫幣五萬七千三百六十四匹帛
四萬九千三百二十二匹木綿九萬二千六百七十
二匹布二萬三千三百九十八匹衣八百五十九襲
鞍勒弓矢有差給嶺北驛牛馬造今年鈔本至元鈔
五千萬貫中統鈔二百五十萬貫汰衛士冒受歲賜

者庚辰併永平路灤邑縣于石城遣定住等括順陽
王兀都思不花邸財物入章佩監中政院禁京城諸
寺邸舍匿商稅辛巳以親祀太廟禮成御大明殿受
朝賀甲申敕翰林國史院纂修仁宗實錄丁亥作佛
事于先天殿戊子幸隆福宮己丑宣德蒙古驛饑命
通政院賑之丁酉詔各郡建帝師八思巴殿其制視
孔子廟有加戊戌交趾蠻儂志德寇脫零那乞等六
洞命守將討之遣使閱實各行省戍兵己亥計京官
俸鈔給米三分癸卯熒惑犯壘壁陣甲辰鐵木迭兒
言和市織幣薄惡由董事者不謹請免右丞高昉等

元史本紀卷二十七
官仍令郡縣更造徵其元直不允太常禮儀院擬進
時享太廟儀式十二月乙巳朔詔曰朕祇適貽謀獲
承丕緒念付託之惟重顧繼述之敢忘爰以延祐七
年十一月丙子被服袞冕恭謝于太廟既大禮之告
成宜普天之均慶屬茲踰歲用易紀元于以導天地
之至和于以法春秋之謹始可以明年爲至治元年
減天下租賦二分包銀五分免大都上都興和三路
差稅三年優復煮鹽煉鐵等戶二年開燕南山東河
治之禁聽民采取命官家屬流落邊遠者有司資給
遣之其子女典鬻於人者聽還其家監察御史廉訪

司歲舉可任守令者二人七品以上官有偉畫長策
可以濟世安民者實封上之士有隱居行義明治體
不求聞達者有司具狀以聞丁未播州蠻蠻的羊籠
寺來降庚戌鑄銅爲佛像置玉德殿壬子賜壽寧公
主鈔七萬五千貫癸丑以天壽節預遣使修醮于龍
虎山乙卯率百官奉玉冊玉寶加上太皇太后尊號
曰儀天興聖慈仁昭懿壽元全德泰寧福慶徽文崇
祐太皇太后翰林學士忽都魯都兒譯進宋儒真德
秀太學衍義帝曰脩身治國無踰此書賜鈔五萬貫
河南饑帝問其故群臣莫能對帝曰良由朕治道未

洽卿等又不盡心乃職委任夫人致陰陽失和災害
荐至自今各務勤恪以應天心母使吾民重困太陰
掩昴丙辰以太皇太后加號禮成御大明殿受朝賀
丁巳詔諭中外戊午太陰犯井庚申太陰犯鬼辛酉
作延春閣後殿壬戌召西僧輦真哈刺思赴京師敕
所過郡縣肅迎乙丑禳星于回回司天監四十晝夜
丙寅以典瑞院使陶徹伯知樞密院事修秘密佛事
于延春閣丁卯鐵木迭兒拜住言此者詔內外言得
失今上封事者或直進御前乞令臣等開視乃入奏
聞帝曰言事者直至朕前可也如細民輒訴訟者則

禁之給武宗皇后鈔七十五萬貫以大學術義印本
頒賜群臣戊辰以太皇太后加號禮成告太廟己巳
敕罷明年二月八日迎佛中書右丞木八剌罷為江
西行省右丞以中書叅知政事只兒哈郎為右丞江
南浙西道廉訪使薛處敬為中書叅知政事遣使閱
奉元路軍需庫辛未拜住進鹵簿圖帝以唐制用萬
二千三百人耗財乃定大駕為三千二百人法駕二
千五百人上思州獠結交趾寇忠州突酉帝聞賀伯
顏母老憫之以所籍京兆田還其家江浙行省平
章政事伯顏察見江西行省平章政事白撒都並坐

貪墨免官是歲決獄輕重七千六百三十事河決汴
梁原武浸灌諸縣滹沱決文安大成等縣渾河溢壞
民田廬秦州成紀縣暴雨山崩朽壤墳起覆沒畜產
汴梁延津縣大風晝晦桑多損大同雨雹大者如鷄
卵諸衛屯田隕霜害稼益津縣雨黑霜

至治元年春正月丁丑修佛事于文德殿壬午增置
朔州都漕運司同知運判各一員甲申召高麗王王
章赴上都丙戌帝服袞冕享大廟以左丞相拜住亞
獻知樞密院事闊徹伯終獻詔群臣曰一歲惟四祀
使人代之不能致如在之誠實所未安歲必親祀以

終朕身廷臣或言祀事畢宜赦天下帝諭之曰恩可
常施赦不可屢下使殺人獲免則死者何辜遂命中
書陳便宜事行之丁亥帝欲以元夕張燈宮中參議
中書省事張養浩上書諫止帝遽命罷之曰有臣若
此朕復何憂自今朕凡有過豈獨臺臣當諫人皆得
言賜養浩帛二疋諸王忽都答兒來朝癸巳諸王斡
羅思部饑發淨州平地倉糧賑之蘄州蘄水縣饑賑
糧三月奉元路饑禁酒乙未太陰掩房己亥降延福
監為延福提舉司廣福監為廣福提舉司秩從五品
以壽安山造佛寺置庫掌財帛秩從七品甲辰辰星

犯外屏水金火土四星聚奎二月汴梁歸德饑發粟
十萬石賑糶河南安豐饑以鈔二萬五千貫粟五萬
石賑之戊申祭社稷改中都威衛爲忠翊侍衛親軍
都指揮使司己酉作仁宗神御殿于普慶寺辛亥調
軍三千五百人修上都華嚴寺壬子夜金火土三星
聚于奎大永福寺成賜金五百兩銀二千五百兩鈔
五十萬貫幣帛萬匹丁巳畋于柳林敕更造行宮監
察御史觀音保鎖咬兒哈的迷失成珪李謙亨諫造
壽安山佛寺殺觀音保鎖咬兒哈的迷失杖珪謙亨
竄于奴兒干地己未樞密院臣請授副使吳元珪榮

祿大夫以階高不允授正奉大夫賑木憐道三十一
驛貧戶辛酉太白犯熒惑癸亥太陰犯心甲子置承
徽寺秩正三品割常州宜興民四萬戶隸之丁卯以
僧法洪爲釋源宗主授榮祿大夫司徒禁越臺省訴
事罷先朝傳旨濫選者戊辰賜公主扎牙八刺從者
鈔七十五萬貫三月甲戌營王也先帖木兒部畜牧
死損賜鈔五十萬貫丙子建帝師八思巴寺於京師
丁丑御大明殿受緬國使者朝貢太陰掩昴賜公主
買的鈔五萬貫駙馬滅憐鈔二萬五千貫召諸王太
平于汴發民丁疏小直沽白河庚辰廷試進士秦普

化宋本等六十四人賜及第出身有差辛巳車駕幸上都遣使賜西番撒思加地僧金二百五十兩銀二千二百兩袈裟二萬幣帛播茶各有差壬午遣呪師朶兒只往牙濟班卜二國取佛經祭未製御服珠袈裟甲申敕纂修仁宗實錄后妃功臣傳乙酉寶集寺金書西番波若經成置大內香殿益壽安山造寺役軍己丑大同路麒麟生甲午置雲南王府己亥宦者李羅鐵木兒坐罪流奴兒干地庚子賑寧國路饑辛丑以鐵失爲御史大夫佩金符領忠翊侍衛親軍都指揮使癸卯益都般陽饑以粟賑之夏四月丙午給

喃咎失王府銀印秩正三品寬徹忽塔迷失王府銅印秩從三品庚戌享太廟江州贛州臨江霖雨袁州建昌旱民皆告饑發米四萬八千石賑之丁巳廣德路旱發米九千石減直賑糶戊午太陰犯心己未造象駕金脊殿吉陽黎蠻寇寧遠縣庚申太陰犯斗戊辰敕賜鐵木迭兒父祖碑命宦者李羅台爲太常署令太常官言刑人難與大祭遂罷之五月丙子毀上都回回寺以其地營帝師殿賑益都膠州饑丁丑霸州蝗戊寅太白犯鬼積尸氣太陰犯軒轅庚辰太陰犯明堂濮州大饑命有司賑之壬午遷親王圖帖穆

爾于海南禁日者母交通諸王駙馬掌陰陽五科者
母泄占候以興國路去歲旱免其田租丁亥修佛事
于大安閣庚寅賑諸王哈賓鉄木兒部沂州民張昱
坐妖言濟南道士李天祥坐教人兵藝杖之女直蠻
赤輿等十九驛饑賑之辛卯海漕糧至直沽遣使祀
海神天妃作行殿于縉山流杯池高郵府旱癸巳寶
定路飛蟲食桑乙未命世家子弟成童者入國學辛
丑太常禮儀院進太廟制圖壬寅開元路霖雨六月
癸卯朔日有食之作金浮屠于上都歲佛舍利乙卯
以鐵木迭兒領宣政院事丁巳叅知政事敬儼罷為

陝西行御史臺中丞戊午涇州雨雹己未太陰犯虛
梁滁州霖雨傷稼蠲其租辛酉太白經天趙弘祚等
言事勒歸鄉里仍禁妄言時政壬戌龍虎山張嗣成
來朝授太玄輔化體仁應道大真人乙丑遣使徃銓
江浙江西湖廣四川雲南五省邊郡官選丁卯祭星
于司天臺大同路雨雹戊辰衛輝汴梁等處蝗己巳
以上都留守只兒哈郎為中書平章政事臨江路旱
免其租通濟屯霖雨傷稼霸州大水渾河溢被災者
二萬三千三百戶秋七月壬申賜晉王也孫鐵木兒
鈔百萬貫遼陽開元等路及順州邢臺等縣大水祭

酉衛輝路昨城縣蝗乙亥賑南恩新州饑丙子淮安
路屬縣水丁丑享太廟戊寅通州潞縣榆棗水決庚
辰鹵簿成渾沱河及范陽縣巨馬河溢辛巳蓋屋縣
僧圓明作亂遣樞密院判官章台督兵捕之壬午通
許臨淮盱眙等縣蝗癸未封太尉李蘭奚爲和國公
乙酉大雨渾河防決庚寅清池縣蝗癸巳太陰犯昴
黃平府蠻盧砮爲寇削萬戶何之祺等官一級遣吏
部尚書教化禮部郎中文矩使安南頒登極詔諸王
闕別薨賻鈔萬五千貫丙申禁服色踰制己亥奉仁
宗及帝御容於大聖壽萬安寺蒲陰縣大水庚子修

上都城詔河南江浙流民復業淮西蒙城等縣饑邵
陽道士劉志先以妖術謀亂復命章台捕之薊州平
谷漁陽等縣大水大都保定真定大名濟寧東平東
昌永平等路高唐曹濮等州水順德大同等路雨雹
乞兒吉思部水八月壬寅修都城安陸府水壞民廬
舍癸卯賑膠州饑甲辰高郵興化縣水免其租丙午
泰興江都等縣蝗丁未太陰犯心戊申祭社稷上都
鹿頂殿成己酉太陰犯斗庚戌以軍士貧乏遣知樞
密院事鐵木兒不花整治仍詔諭中外有敢擾害者
罪之賑北部孤寡糧鈔賜公主速哥八刺鈔五十萬

貫兀兒速斡哈納思等部貧乏戶給牝馬二疋壬子
熒惑犯軒轅乙卯中書平章政事鐵木兒脫罷爲上
都留守壬戌淮安路鹽城山陽縣水免其租車駕駐
蹕興和左右以寒甚請還京師帝曰兵以牛馬爲重
民以稼穡爲本朕遲留蓋欲馬得芻牧民得刈獲一
舉兩得何計乎寒雷州路海康遂溪二縣海水溢壞
民田四千餘頃免其租秦州成紀縣山崩九月乙亥
熒惑犯靈臺京師饑發粟十萬石減價糶之丙子駐
蹕昂兀嶺壬午熒惑犯太微西垣上將賜諸王撒兒
蠻鈔五萬貫壬辰中書平章政事塔失海牙坐受賕

杖免丁酉熒惑犯太微垣右執法車駕還大都庚子
安陸府漢水溢壞民田賑之冬十月辛丑朔修佛事
於大內妖僧圓明等伏誅甲午太白經天戊申熒惑
犯太微垣左執法庚戌親享太廟壬子拜住獻嘉禾
兩莖同穗癸丑敕翰林集賢官年七十者毋致仕以
內郡水罷不急工役敕蒙古子女鬻爲回回漢人奴
者官收養之禁中書掾曹母泄機事命樞密遣官整
視各郡兵馬戊午置趙王馬札罕部錢糧總管府秩
正三品己未肇慶路水賑之丙寅河南行省叅知政
事你咱馬丁坐殘忍免官丁卯增置侍儀司通事舍

元史本紀卷二十七
十一
人六負侍儀舍人四負已巳遣燕鐵木兒巡邊十一月辛未熒惑犯進賢已亥辛大護國仁王寺丙子太陰犯虛梁戊寅御大明殿群臣上尊號曰繼天體道敬文仁武大昭孝皇帝是夜辰星犯房已卯以受尊號詔天下拜住請釋囚不允庚辰益壽安山寺役卒三千人辛巳命御史大夫鐵失領左右阿速衛丙戌太陰犯井丁亥以教官待選者借注廣海巡檢己丑太陰犯酒旗又犯軒轅庚寅拜住等言受尊號宜謝太廟行一獻禮世祖亦嘗議行武宗則躬行謝禮詔曰朕當親謝命太史卜曰樞密選兵肄鹵簿辛卯太

陰犯明堂癸巳以營田提舉司徵酒稅擾民命有司無權之甲午以遼陽行省管內山場隸中政院丙申敕立故丞相安童碑于保定新城戊戌鞏昌成州饑發義倉賑之己亥太白犯西咸十二月庚子給蒙古子女冬衣辛丑立亦啓烈氏爲皇后遣攝太尉中書右丞相鐵木迭兒持節授玉冊玉寶癸卯以立后詔天下慶遠路饑真定路疫並賑之甲辰熒惑犯亢戊申躬謝太廟庚戌太陰犯昴作太廟正殿甲寅疏王泉河車駕幸西僧灌項寺己未封竣南歲卜爲白蘭王錫金印真定保定大名順德等路水民饑禁釀酒

以金虎符頒各行省平章政事辛酉熒惑入氏甲子
置田糧提舉司掌薊景二州田賦以給衛士貧乏者
秩從五品命帝師公哥羅古羅思監歲班歲卜詣西
番受具足戒賜金千三百五十兩銀四千五十兩幣
帛萬匹鈔五十萬貫以諸王怯伯使者數入朝設兵
守北口及盧溝橋河間路饑賑之復以馬家奴為司
徒乙丑置中瑞司冶銅五十萬斤作壽安山寺佛像
寧海州蝗歸德遼陽通州等處水

本紀卷第二十七

本紀卷第二十八

元史二十八

翰林學士史夫知制誥兼修國史臣宋濂翰待制承直郎知制誥兼國史院編修官臣王禕等奉
勅修

英宗二

二年春正月己巳朔安南占城各遣使來貢方物壬
申保定雄州饑賑之庚午廣太廟甲戌禁漢人執兵
器出獵及習武藝丁丑太陰犯昴親祀太廟始陳鹵
薄賜導駕耆老幣帛戊寅敕有司存卹孔氏子孫貧
乏者己卯山東保定河南汴梁歸德襄陽汝寧等處
饑發米三十九萬五千石賑之庚辰太白犯建星公

主阿刺忒納八刺下嫁賜鈔五十萬貫辛巳太白犯
建星敕臺憲用人勿拘資格儀封縣河溢傷稼賑之
癸未流徽政院使羅源于耽羅建行殿于柳林封塔
察兒爲蘭國公辛卯太陰犯心癸巳以西僧羅藏爲
司徒鄧州饑糶米十萬石賑之甲午熒惑犯房丁酉
太白犯牛二月己亥朔熒惑犯建閉星庚子置左右
欽察衛親軍都指揮使司命拜住搃之罷上都歇山
殿及帝師寺役辛丑賜鐵失父祖碑癸卯以江南行
臺御史大夫欽察爲中書平章政事江浙行省參政
王居仁爲中書叅知政事薛昶散罷爲河南行省左

丞丙午熒惑犯罰星戊申祭社稷順德路九縣水旱
賑之太陰犯井庚戌熒惑犯東咸辛亥太陰犯酒旗
及軒轅壬子太白犯壘壁陣賜諸王案忒不花鈔七
萬五千貫以徹兀台禿忽魯死事賜鈔三萬五千貫
諸王怯伯遣使進文豹河間路飢禁釀酒癸丑太陰
犯明堂甲寅以太廟役軍造流孟池行殿廣海郡邑
官曠負敕愿徃任者陞秩二等乙卯以遼陽行省平
章政事買驢爲中書平章政事西僧亦思刺蠻展普
疾詔爲釋大辟囚一人笞罪二十人戊午賑真定等
路饑己未太陰犯天江括馬賜宗仁衛壬戌太白犯

壘壁陣諸王怯伯遣使進海東青鶻癸亥遼陽等路
飢免其租仍賑糧一月甲子恩州水民饑疫賑之三
月己巳中書省臣言國學廢弛請令中書平章政事
廉恂參議中書事張養浩都事李朮魯翀董之外郡
學校仍命御史臺翰林院國子監同議興舉從之敕
四宿衛興聖宮及諸王部勿用南人斡羅思告訐父
母斬之辛未禁捕天鵝違者籍其家壬申復張珪司
徒臨安路河西諸縣饑賑之癸酉河南兩淮諸郡饑
禁釀酒丙子延安路饑賑糧一月罷京師諸營繕役
卒四萬餘人河間河南陝西十二郡春旱秋霖民饑

免其租之半戊寅脩都城庚辰敕江浙僧寺田除宋
故有永業及世祖所賜者餘悉稅之癸未賑遼陽女
直漢軍等戶饑乙酉賑濮州水灾丙戌以親祀禮成
賜與祭者幣普減内外官吏一資萬戶哈刺那海以
私粟賑軍賜銀幣仍酬其直給行通政院印賜潛邸
四宿衛士鈔有差復置市舶提舉司於泉州慶元廣
東三路禁子女金銀絲綿下番丁亥鳳翔道士王道
明妖言伏誅己丑有暈貫日如連環賜諸王斡羅溫
孫銀印命有司建木華黎祠於東平仍樹碑以國用
匱竭停諸王賞賚及皇后荅里麻失等歲賜庚寅曹

州滑州饑賑之命將作院更製冕旒辛卯遣御史錄
囚置甘州八刺哈孫驛監察御史何守謙坐贓杖免
壬辰賑上都十一驛給宗仁衛蒙古子女衣糧賜諸
王脫烈鐵木兒鈔五萬貫甲午遼陽哈里賓民饑賑
之丁酉韋柳林駙馬許訥之子速怯訴曰臣父謀叛
臣毋私從人帝曰人子事親有隱無犯今有過不諫
乃復告許命誅之賑奉元路饑夏四月戊戌朔車駕
幸上都己亥嶺北蒙古軍饑給糧遣還所部庚子賑
彰德路饑壬寅真州火徽州饑並賑之辛亥涇州雨
雹免被灾者租壬子公主失憐荅里薨賜鈔五萬貫

甲寅南陽府西穰等屯風雹洪澤芍陂屯田去年旱
蝗並免其租丙辰恩州饑禁釀酒乙丑中書省臣請
節賞賚以紓民力帝曰朕思所出倍於所入出納之
際卿輩宜慎之朕當搏節其用丙寅賜邊卒鈔帛賑
東昌霸州饑民松江府上海縣水仍旱五月己巳以
公主速哥八刺為趙國大長公主免德安府被災民
租修滹沱河堤彰德府饑禁釀酒庚午泰符臨邑二
縣民謀逆其首王驢兒伏誅餘杖流之睢許二州去
年水旱免其租辛未駙馬脫脫賜鈔五萬貫丙子
癸惑退犯東咸庚辰賑固安州饑置營於永平收養

蒙古子女遣使諭四方匿者罪之癸未以御史大夫脫脫爲江南行臺御史大夫置宗仁蒙古侍衛親軍都指揮使司甲申車駕幸五臺山賑夏津永清二縣饑以只兒哈郎爲御史大夫乙酉以拜住領宗仁蒙古侍衛親軍都指揮使司事佩三珠帑符京師饑發粟二十萬石賑糴雲南行省平章答失鐵木兒朶兒只坐贓杖免戊子禁民集衆祈神庚寅河南陝西河間保定彰德等路饑發粟賑之仍免常賦之半調各衛漢軍二千充宗仁衛屯田卒禁星于五臺山甲午賑鞏昌階州饑丙申以吳全節爲玄教大宗師特進

上卿閏月戊戌封諸葛忠武侯爲威烈忠武顯靈仁濟王辛丑萬戶李英以良民爲奴擅文其面坐罪癸卯禁白蓮佛事睢陽縣亳社屯大水饑賑之諸王阿馬承童坐擅徙脫列捏王衛士並杖流海南甲辰御史臺臣請黜監察御史不稱職者以示懲勸從之丙午嶺北戌卒貧乏賜鈔三千二百五十萬貫帛五十萬疋戊申奉元路郿縣及成州饑並賑之以鐵木迭兒子同知樞密院事班丹知樞密院事己酉也不干八禿兒戌邊有功賜以金鈔壬子作紫檀殿乙卯以淮安路去歲大水遼陽路隕霜殺禾南康路旱並免

其租壬戌安豐屬縣霖雨傷稼免其租興元褒城縣
饑賑之甲子真定山東諸路饑弛其河泊之禁丙寅
辰州沅陵縣洞蠻爲寇遣兵捕之敕已除不赴任者
奪其官封公主連哥八刺乳母爲順國夫人六月丁
卯朔車駕至五臺山禁扈從宿衛毋踐民禾置中慶
大理二路推官各一員戊辰揚州屬縣旱免其租已
巳廣元路綿谷昭化二縣饑官市米賑之壬申熒惑
犯心癸酉申禁日者妄談天象甲戌新平上蔡二縣
水免其租丙子修渾河堤壬午辰州江水溢壞民廬
舍丁亥奉元屬縣水淮安屬縣旱並免其租庚寅思
州風雹建德路水皆賑之秋七月戊戌淮安路水民
饑免其租己亥熒惑犯天江丁未賜拜住平江田萬
畝壬子遣親王閻闡充摠兵北邊賜金二百五十兩
銀二千五百兩鈔五十萬貫戊午太陰犯井宿越星
車駕次應州曲赦金城縣囚徒庚申陞靖州爲路辛
酉次澤源州中書左丞張思明坐罪杖免籍其家甲
子錄京師諸役軍匠病者千人各賜鈔遣還南康路
大水廬州六安縣大雨水暴至平地深數尺民饑命
有司賑糧一月八月戊辰祭社稷己巳道州寧遠縣
民符翼軫作亂有司討擒之壬申蔚州民獻嘉禾甲

戊次奉聖州築宗仁衛營給廬州流民復業者行糧
 戊寅詔畫蠶麥圖於庶頂殿壁以時觀之可知民事
 也己卯廬州路六安舒城縣水賑之庚辰增壽安山
 寺役卒七千人庚寅鐵木迭兒卒命給直市其葬地
 甲午瑞州高安縣饑命有司賑之九月戊戌大寧路
 水達達等驛水傷稼賑之給蒙古子女貧乏者鈔七
 百五十萬貫戊申給壽安山造寺役軍匠死者鈔人
 百五十貫庚戌申禁江南典雇妻妾辛亥幸壽安山
 寺賜監役官鈔人五千貫甲寅賑淮東秦興等縣饑
 丙辰太皇太后崩戊午賜蒙古子女鈔百五十萬貫

己未太陰犯明堂庚申敕停今年冬祀南郊癸亥地
 震甲子臨安河西縣春夏不雨種不入土居民流散
 命有司賑給令復業作層樓於涿州庶頂殿西丙寅
 西僧班吉疾賜鈔五萬貫冬十月丁卯太史院請禁
 明年興作土功從之戊辰享太廟以國哀迎香去樂
 修廟工役未畢妨陳宮懸止用登歌丙子押濟思國
 遣使來貢方物江南行臺大夫脫脫坐請告未得旨
 輒去職杖謫雲南庚辰至辛巳太陰犯井甲申建太
 祖神御殿于興教寺己丑癸感犯壘壁陣以拜住為
 中書右丞相南恩州賊潭庚生等降十一月甲午朔

日有食之己亥以立右丞相詔天下流民復業者免
差稅三年站戶貧乏鬻賣妻子者官贖還之凡差役
造作先科商賈末技富實之家以優農力免陝西明
年差稅十之三各處官佃田明年租十之二江淮荆
科包銀全免之御史李端言近者京師地震日月薄
蝕皆臣下失職所致帝自責曰是朕思慮不及致然
因敕群臣亦當修飭以謹天戒罷世祖以後冗置官
括江南僧有妻者爲民安南國遣使來貢方物回賜
金四百五十兩金幣九帛如之癸卯地震甲辰太白
犯壘壁陣羅徽政院乙巳熒惑犯壘壁陣丙午造龍

船三艘戊申太陰掩井岷州旱疫賑之賜戍北邊萬
戶千戶等官金帶御史李端言朝廷雖設起居注所
錄皆臣下聞奏事目上之言動宜悉書之以付史館
世祖以來所定制宜著爲令使吏不得爲奸治獄
者有所遵守並從之乙卯遣西僧高主瓦迎帝師宣
德府宣德縣地屢震賑被灾者糧鈔己未太陰犯東
咸定脫脫禾孫入流官選給印與俸置八番軍民安
撫司改長官所二十有八爲州縣庚申太陰犯天江
辛酉熒惑犯歲星真人蔡遁泰殺人伏誅刑部尚書
不谷失里坐受其金范德郁坐詭隨並杖免平江路

水損官民田四萬九千六百三十頃免其租十二月
甲子朔南康建昌州大水山崩死者四十七人民饑
命賑之己丑太白歲星熒惑三星聚于室太白犯壘
壁陣丁卯中書平章政事買驢罷為太司農廉恂罷
為集賢大學士以集賢大學士張珪為中書平章政
事戊辰以掌道教張嗣成吳全節藍道元各三授制
命銀印敕奪其二壬申免回回人戶屯戍河西者銀
稅甲戌兩江來安路提管岑世興作亂遣兵討之鐵
木迭兒子宣政院使八思吉思坐受劉夔冒獻田地
伏誅仍籍其家乙亥太陰掩井丙寅增鎮南王脫不

花戍兵戊寅太白犯歲星庚辰葛蠻安撫司副使龍
仁貴作亂湖廣行省督兵捕之以知樞密院事欽察台
為宣政院使叅知政事速速為中書左丞宗仁侍衛
親軍都指揮使馬剌為叅知政事癸未紹興路柔遠
州洞蠻把者為寇遣兵捕之以御史大夫只兒哈郎
知樞密院事封閣闈禿為武寧王授金印以地震日
食命中書省樞密院御史臺翰林集賢院集議國家
利害之事以聞敕兩都營繕仍舊餘如所議弛河南
陝西等處酒禁禁近侍奏取沒入錢物乙酉杭州火
賑之丙戌定謚太皇太后曰昭獻元聖遣太常禮儀

院使朶台以謚議告于太廟陞寧昌府爲下路增置一縣併雲南西沙縣入寧州賜淮安忠武王伯顏祠祭田二十頃己丑熒惑犯外屏太陰犯建星辛卯給蒙古流民糧鈔遣還本部張珪足疾免朝賀西僧灌頂疾請釋囚帝曰釋囚祈福豈爲師惜朕思惡人屢赦反害善良何福之有宣徽院臣言世祖時晃吉刺歲輸尚食羊二千成宗時增爲三千今請增五千帝不許曰天下之民皆朕所有如有不足朕當濟之若加重賦百姓必致困窮國亦何益命遵世祖舊制徵州廬州濟南真定河間大名歸德汝寧鞏昌諸處及

河南芍陂屯田水大同衛輝江陵 雋縣及豐贍署大惠屯風河南及雲南烏蒙等處屯田旱汴梁順德河間保定慶元濟寧濮州益都諸屬縣及諸衛屯田蝗三年春正月癸巳朔暹國及八番洞蠻酋長各遣使來貢曹州禹城縣去秋霖雨害稼縣人邢著程進出粟以賑饑民命有司旌其門乙未享太廟己亥思明州盜起湖廣行省督兵捕之庚子刑部尚書烏馬兒坐贓杖免壬寅命太僕寺僧給牝馬百匹供世祖仁宗御容殿祭祀馬湏和林阿蘭禿等驛戶貧乏給鈔賑之以行中書省平章政事復兼總軍政軍官有罪

重者以聞輕者就決罷上都雲州與和宣德蔚州奉
聖州及鷄鳴山房山黃蘆三义諸金銀冶聽民採鍊
以十分之三輸官授前樞密院副使吳元珪王約集
賢大學士翰林侍講學士韓從益昭文館大學士並
商議中書省事拜住言前集賢侍講學士趙居信直
學士吳澄皆有德老儒請徵用之帝喜曰卿言適副
朕心更當搜訪山林隱逸之士遂以居信爲翰林學
士承旨澄爲學士增置上都留守司判官二員以漢
人爲之專掌刑名置仁宗中宮位提舉司二秩正五
品隸承徽寺太陰犯鉞星又犯井癸卯太陰犯井甲

辰鎮西武寧王部旣賤之遣諸王忽刺出往鎮雲南
賜鈔萬五千貫辛亥申命鐵失振舉臺綱壬子建諸
王驛於京師遣回回砲手萬戶赴汝寧新蔡遵世祖
舊制教習砲法靜江邕柳諸郡獠爲寇命湖廣行省
督兵捕之甲寅以宗仁衛蒙古子女額足萬戶命罷
收之乙卯征東末吉地兀者戶以貂鼠水獺海狗皮
來獻詔存卹三歲丙辰泉州民留應搃作亂命江浙
行省遣兵捕之丁巳定封贈官等秩辛酉禁故殺子
孫誣平民者增置兵部尚書一員四川行省平章政
事趙世延爲其弟訟不法事繫獄待對其弟逃去詔

出之仍著爲令逃者百日不出則釋待對者命樞密副使完顏納丹侍御史曹伯啓也可札魯忽赤不顏集賢學士欽察翰林直學士曹元用聽讀仁宗時纂集累朝格例敕常調官外不次銓用者但陞以職勿陞其階二月癸亥朔作上都華嚴寺八思巴帝師寺及拜住第役軍六千二百人定軍官襲職嫡長子孫幼者令諸兄弟姪攝之所受制敕書權襲以息爭訟是夜熒惑太白填星三星聚于胃丙寅翰林國史院進仁宗實錄遣教化等往西番撫初附之民徵畜牧治郵傳戊辰祭社稷天壽節賓丹瓜哇等國遣使來

貢已巳修廣惠河牌十有九所治野狐桑乾道癸酉畋于柳林顧謂拜住曰近者地道失寧風雨不時豈朕慕承大寶行事有闕歟對曰地震自古有之陛下自責固宜良由臣等失職不能燮理帝曰朕在位三載於兆姓萬物豈無乖戾之事卿等宜與百官議有便民利物者朕即行之置鎮遠王也不干王傳官屬罷播州黃平府長官所一徙其民隸黃平是夜太白犯昴辛巳造五輅司徒劉夔同僉宣政院事囊加台坐妄獻地土冒取官錢伏誅格例成定凡二千五百三十九條內斷例七百一十七條格千一百五十一

元史卷之三十一
詔赦九十四令類五百七十七名曰大元通制頒行天下是夜太陰犯東咸癸未賑北邊軍鈔二十五萬錠糧二萬石命宣徽院選蒙古子男四百入宿衛罷徽政院總管府三都總管府隸有司怯憐口及人匠總管府隸陝西行中書省降開成路爲州丙戌雨土京師飢發粟二萬石賑糶造五輅旗丁亥敕金書歲經二部命拜住等總之戊午封鷹師不花爲趙國公辛卯以太子賓客伯都廉貧賜鈔十萬貫諸王月思別遣使來朝罷稱海宣慰司及萬戶府改立屯田總管府諸王怯伯遣使貢蒲萄酒海漕糧至直沽遣使

祀海神天妃三月壬辰朔車駕幸上都賜諸王喃谷失言鈔二百五十萬貫復給諸王脫歡歲賜丁酉平江路嘉定州饑發粟六萬石賑之戊戌安豐芍陂屯田女直戶饑賑糧一月庚子崇明諸州饑發米萬八千三百石賑之甲辰台州路黃巖州饑賑糧兩月丁未西番參卜郎諸族叛敕鎮西武靖王搠思班等發兵討之戊申祔太皇太后于順宗廟室遣攝太尉中書右丞相拜住奉玉冊玉寶上尊謚曰昭獻元聖皇后辛亥以圓明王道明之亂禁僧道度牒符錄丙辰敕醫卜匠官居喪不得去職七十不聽致仕子孫無

元史紀事本末卷三十一
三
蔭叙能紹其業者量材錄用監察御史拜住教化坐
舉八思吉思失當並黜免諸王火魯灰部軍驛戶饑
賑之夏四月壬戌朔敕天下諸司命僧誦經十萬部
丙寅察罕腦兒蒙古軍驛戶饑賑之丁卯旌內黃縣
節婦王氏己巳浚金水河甲戌命張珪及右司員外
郎王士熙勉勵國子監學敕都功德使闊兒魯至京
師釋囚大辟三十一人杖五十七以上者六十九人
放籠禽十萬令有司償其直己卯詔行助役法遣使
考視稅籍高下出田若干畝使應役之人更掌之收
其歲入以助役費官不得與比邊軍饑賑之蒙古大

千戶部比歲風雪斃畜牧賑鈔二百萬貫敕京師萬
安慶壽聖安普慶四寺楊子江金山寺五臺萬聖祐
國寺作水陸佛事七晝夜丁亥故羅羅斯宣慰使述
古妻漂末權領司事遣其子娑住邦來獻方物戊子
南豐州民及鞏昌蒙古軍饑賑之五月辛卯設大理
路白益城榷稅官秩正七品中慶路榷稅官秩從七
品置安慶潛山縣雲南寧遠州戊戌太白經天庚子
大風雨雹拔柳林行宮內外大木二千七百辛丑以
鐵失獨署御史大夫事壬寅雲南行省平章政事忽
辛坐賊杖免詔中外開言路置慶元路嶧山縣增尉

一負徙安寨縣於龍安驛癸卯太陰犯房乙巳嶺北
米貴禁釀酒戊申監察御史蓋繼元宋翼言鐵木迭
兒奸險貪污請毀所立碑從之仍追奪官爵及封贈
制書帝御大安閣見太祖世祖遺衣皆以縑素木綿
爲之重加補綴嗟歎良久謂侍臣曰祖宗創業艱難
服用節儉乃如此朕焉敢頃刻忘之太白犯畢癸丑
荆湖宣慰使脫剌受賂事覺召至京師御史臺臣請
遣就鞫不允乙卯賜勲舊子撒兒蠻按灰鐵木兒也
先鐵木兒鈔人萬五千貫以鈔千萬貫市羊馬給嶺
北戍卒人驟馬二牝馬三羊十五禁驛戶無質賣官

地丙辰東安州水壞民田千五百六十頃戊午真定
路武邑縣兩水害稼奉元行宮正殿災上都利用監
庫火帝令衛士撲滅之因語群臣曰世皇始建宮室
于今安焉朕嗣登大寶而值此燬此朕不能圖治之
故也欽察衛兵戍邊有卒累功請賞以官帝曰名爵
豈賞人之物命賜鈔三千貫大名路魏縣霖雨大同
路鴈門屯田旱損麥諸衛屯田及永清縣水保定路
歸信縣蝗六月寇圍寧都州民孫正臣出糧餉軍旌
其閏丁卯西番參卜郎諸寇未平遣徽政使醜驢往
督師戊辰毀鐵木迭兒父祖碑追收元受制書告諭

中外贈乳母忽禿台定襄郡夫人其夫阿來追封定襄王謚忠愍壬申將作院使哈撒兒不花坐岡上營利杖流東裔籍其家留守司以雨請修都城有旨今年歲不宜大興土功其略完之癸酉置太廟夾室贈燕赤吉台太赤爲襄安王諸王別思鐵木兒統兵北部別頒歲賜太常請募修累朝儀禮從之癸未填星犯畢乙酉易安滄莫霸祁諸州及諸衛屯田水壞田六千餘頃諸王怯伯數寇邊至是遣使來降帝曰朕非欲彼土地人民但吾民不罹邊患軍士免於勞役斯幸矣今旣來降當厚其賜以安之秋七月辛卯朔宣

政使欽察台自傳旨署事中書以體制非宜請通行禁止從之壬辰占城國王遣其弟保佑八刺遞奉表來貢方物真定路驛戶飢賑糧二千四百石癸卯太廟成班丹坐賊杖免賜刺禿屯田貧民鈔四十六萬八千貫市牛具甲辰諸王帖木兒還自雲南入宿衛賜鈔二萬五千貫乙巳招諭左右兩江黃勝許岑世興已酉封諸王忽都鐵木兒爲威遠王授金印戒海道歲運糧二十萬石併免江淮增科糧甲寅買馬行宮駕車六百五十匹丙辰永寧王卜鐵木兒爲不法命宗正府及近侍雜治其傳籍鐵木迭兒家資諸王

徹徹禿入朝請印帝以其政績未著不允賜鈔二十
五萬貫御史臺請降旨開言路帝曰言路何嘗不開
但卿等選人未當爾朔州雨水害屯田稼真定州諸
路屬縣蝗災寧興和大同三路屬縣隕霜東路蒙古
萬戶府饑賑粮兩月八月癸亥車駕南還駐蹕南坡
是夕御史大夫鐵失知樞密院事也先帖木兒大司
農失禿兒前平章政事赤斤鐵木兒前雲南行省平
章政事完者鐵木迭兒子前治書侍御史鎖南鐵失
弟宣徽使鎖南典瑞院使脫火赤樞密院副使阿散
僉書樞密院事章台衛士禿滿及諸王按梯不花孛
羅月魯不花曲呂不花兀魯思不花等謀逆以鐵失
所領阿速衛兵爲外應鐵失赤斤鐵木兒殺丞相拜
住遂弒帝於行幄年二十一從葬諸帝陵泰定元年
二月上尊謚曰睿聖文孝皇帝廟號英宗四月上
國語廟號曰格堅英宗性剛明嘗以地震減膳徹樂
避正殿有近臣稱觴以賀問何爲賀朕方修德不暇
汝爲大臣不能匡輔反爲誦耶斥出之拜住進曰地
震乃臣等失職宜求賢以代曰毋多遜此朕之過也
嘗戒群臣曰卿等居高位食厚祿當勉力圖報苟或
貧乏朕不惜賜汝若爲不法則必刑無赦八思吉思

下獄謂左右曰法者祖宗所制非朕所得私八思吉思
雖事朕日久今其有罪當論如法嘗御鹿頂殿謂拜
住曰朕以幼冲嗣承大業錦衣玉食何求不得惟我
祖宗擲風沐雨戡定萬方曾有此樂邪卿元勲之裔
當體朕至懷毋忝爾祖拜住頓首對曰創業惟艱守
成不易陛下睿思及此億兆之福也又謂大臣曰中
書選人署事未旬日御史臺即改除之臺除者中書
亦然今山林之下遺逸良多卿等不能盡心求訪惟
以親戚故舊更相引用耶其明斷如此然以果於刑
戮奸黨畏誅遂搆大變云

本紀卷第二十八

本紀卷第二十九

元史二十九

翰林學士亞答知制誥修曩果瀛翰林待制承直郎知制誥國史院編官王權等奉
勅修

泰定帝一

泰定皇帝諱也孫鐵木兒顯宗甘麻剌之長子裕宗
之嫡孫也初世祖以第四子那木罕為北安王鎮北
邊北安王薨顯宗以長孫封晉王代之統領太祖四
大幹耳朵及軍馬達達國土至元十三年十月二十
九日帝生于晉邸大德六年晉王薨帝襲封是為嗣
晉王仍鎮北邊成宗武宗仁宗之立咸與翊戴之謀

有盟書焉王府內史倒刺沙得幸於帝常偵伺朝廷
事機以其子哈散事丞相拜住且入宿衛久之哈散
歸言御史大夫鐵失與拜住意相忤欲傾害之至治
三年三月宣徽使探忒來王邸爲倒刺沙言主上將
不容於晉王汝盍思之於是倒刺沙與探忒深相要
結八月二日晉王獵於禿刺之地鐵失密遣斡羅思
來告曰我與哈散也先鐵木兒失禿兒謀已定事成
推立王爲皇帝又命斡羅思以其事告倒刺沙且言
汝與馬速忽知之勿令旭邁傑得聞也於是王命囚
斡羅思遣別烈迷失等赴上都以逆謀告未至癸亥

英宗南還駐蹕南坡是夕鐵失等矯殺拜住英宗遂
遇弒于幄殿諸王按梯不花及也先鐵木兒奉皇帝
璽綬北迎帝于鎮所癸巳即皇帝位於龍居河大赦
天下詔曰薛禪皇帝可憐見嫡孫裕宗皇帝長子我
仁慈甘麻刺爺爺根底封授晉王統領成吉思皇帝
四个大斡耳朵及軍馬達達國土都付來依著薛禪
皇帝聖旨小心謹慎但凡軍馬人民的不揀甚麼勾
當裏遵守正道行來的上頭數年之間百姓得安業
在後完澤篤皇帝教我繼承位次大斡耳朵裏委付
了來已委付了的大營盤看守著扶立了两箇哥哥

曲律皇帝普顏篤皇帝姪碩德八剌皇帝我累朝皇帝根底不謀異心不圖位次依本分與國家出氣力行來諸王哥哥兄弟每衆百姓每也都理會的也者今我的姪皇帝生天了也麼道迤南諸王大臣軍上的諸王駙馬臣僚達達百姓每衆人商量著大位次不宜又虛惟我是薛禪皇帝嫡派裕宗皇帝長孫大位次裏合坐地的體例有其餘爭立的哥哥兄弟也無有這般晏駕其間比及整治以來人心難測宜安撫百姓使天下人心得寧早就這裏即位提說上頭從著衆人的心九月初四日於成吉思皇帝的大斡

耳染裏大位次裏坐了也交衆百姓每心安的上頭赦書行有是日以知樞密院事淇陽王也先鐵木兒爲中書右丞相諸王月魯鐵木兒襲封安西王甲午以內史倒刺沙爲中書平章政事乃馬台爲中書右丞鐵失知樞密院事馬思忽同知樞密院事孛羅爲宣徽院使旭邁傑爲宣政院使乙未大理護子羅蠻爲寇以樞密副使阿散爲御史中丞內史善僧爲中書左丞丁酉以完澤知樞密院事禿滿同僉樞密院事戊戌以撒的迷失知樞密院事章台同知樞密院事己亥敕諭百司九銓授官遵世祖舊制惟樞密院

御史臺宣政院宣徽院得自奏聞餘悉由中書辛丑以馬某沙知樞密院事失禿兒爲大司農召諸王官屬流徙遠地及還元籍者二十四人還京師是歲大寧蒙古大千戶部風雪斃畜牧賑米十五萬石南康漳州二路水淮安揚州屬縣飢賑之冬十月癸亥修佛事於大明殿甲子遣使至大都以即位告天地宗廟社稷誅逆賊也先鐵木兒完者鎖南禿滿等於行在所以旭邁傑爲中書右丞相陝西行中書左丞相禿魯通政院使紐澤並爲御史大夫速速爲御史中丞遣旭邁傑紐澤誅逆賊鐵失失禿兒赤斤鐵木兒

脫火赤章台等於大都並戮其子孫籍入家產己巳太白犯亢戊辰召亦都護高昌王鐵木兒補化壬申以內史按答出爲太師知樞密院事丙子太白犯氐詔百司遵守世祖成憲癸未以旭邁傑兼阿速衛達魯花赤丙戌以江淞行省平章政事兀伯都刺爲中書平章政事八番順元及靜江大理威楚諸路徭兵爲寇敕湖廣雲南二省招諭之揚州江都縣火雲南王西平王二部衛士飢皆賑之十一月己丑朔熒惑犯亢車駕次于中都修佛事於昆剛殿庚寅太白犯鉤鈴丙申次于祖媯乙未太白犯東咸辛丑車駕至

大都壬寅焚惑犯氏諸王怯別遣使來朝丁未御大明殿受諸王百官朝賀庚戌詔百司朝夕視事毋怠辛亥御史中丞董守庸坐黨鐵失免官壬子敕營繕不急者罷之癸丑遣使詣曲阜以太牢祀孔子敕會福院奉北安王那木罕像于高良河寺祭道甲五福神甲寅諸王怯別遣使來朝乙卯祭星於司天監丙辰御史中丞速速坐貪淫免官丁巳廣州路新會縣民犯長弟作亂廣東副元帥烏馬兒率兵捕之雲南開南州大阿哀阿三木台龍買六千餘人寇哀卜白鹽井詔凡有罪自首者原其罪袁州路宜春縣鎮江

路丹徒縣饑賑糶米四萬九千石沅州黔陽縣饑芍陂屯田旱並賑之十二月己未御史臺經歷朵兒只班御史撒兒塔罕兀都蠻郭也先忽都並坐黨鐵失免官御史言曩者鐵木迭兒專政誣殺楊朵兒只蕭拜住賀伯顏觀音保鎖咬兒哈的迷失黥竄李謙亨成珪罷免王毅高昉張志弼天下咸知其寃請昭雪之詔存者召還錄用死者贈官有差授諸王薛徹干以其父故金印庚申以宦者剛荅里爲中政院使壬戌賜潛邸衛士鈔人六十錠浚鎮江路漕河及練湖役丁萬三千五百人給諸王八刺失里印戊辰請皇

考皇妣謚于南郊皇考晉王曰光聖仁孝皇帝廟號
顯宗皇妣晉王妃曰宣懿淑聖皇后己巳辰星犯壁
壘陣庚午以即位大賚后妃諸王百官金七百餘錠
銀三萬三千錠錢及幣帛稱是遣使祀海神天妃盜
入太廟竊仁宗及莊懿慈聖皇后金主辛未熒惑犯
房壬申作仁宗主仍督有司捕盜崇星于司天監癸
酉德慶路瀧水縣徭劉寅等降甲戌命道士吳全節
修醮事乙亥征東夷民奉獸皮來附太常院臣言世
祖以來太廟歲惟一享先帝始復古制一歲四祭請
裁擇之帝曰祭祀大事也朕何敢簡其禮命仍四祭
監察御史脫脫趙成慶等言鐵木迭兒在先朝包藏
禍心離間親藩誅戮大臣使先帝孤立卒罹大禍其
子鎖南親與逆謀又追天憲乞正其罪以快元元之
心月魯禿禿哈速敦皆鐵失之黨不宜寬宥遂並伏
誅丙子命嶺北守邊諸王徹徹禿月修佛事以却寇
兵己卯命僧作佛事於大內以厭雷增諸王薛徹干
駙馬哈伯等歲賜金銀幣帛有差辛巳熒惑犯東咸
壬午諸王月思別遣怯烈來朝賜以金幣癸未廣西
右江來安路總管岑世興遣其弟世元入貢流諸王
月魯鐵木兒於雲南按梯不花于海南曲呂不花于

奴兒干孛羅及兀魯思不花于海島並坐與鉄失等
逆謀乙酉雲南車里于孟爲寇詔招諭之諭百司惜
名器各遵世祖定制丙戌旭邁傑言近也先鐵木兒
之變諸王買奴逃赴潛邸願効死力且言不除元兇
則陛下美名不著天下後世何從而知上契聖衷嘗
蒙獎諭今臣等議宗戚之中能自拔逆黨盡忠朝廷
者惟有買奴請加封賞以示激勸遂以泰寧縣五千
戶封買奴爲泰寧王知樞密院事大司徒闊徹伯授
開府儀同三司以前太師拜忽商議軍國重事丁亥
議賞討逆功賜旭邁傑金十錠銀三十錠鈔七十錠

倒刺沙爲中書左丞相知樞密院事馬其沙御史大
夫紐澤宣政院使鎖禿並加授光祿大夫仍賜金銀
鈔有差塑馬哈吃刺佛像於延春閣之徽清亭下詔
改元詔曰朕荷天鴻禧嗣大歷服側躬圖治夙夜祗
畏惟祖訓是遵乃開歲甲子景運伊始思與天下更
新稽諸典禮踰年改元可以明年爲泰定元年免大
都興和差稅三年八番思播兩廣洞寨差稅一年江
淮勑科包銀三年四川雲南甘肅秋糧三分河南陝
西遼陽絲鈔三分除虛增田稅免幹脫逋錢賑恤雲
南廣海八番等處戍軍求直言賜高年帛禁獻山場

湖泊之利定吏負出身者秩止四品以追尊皇考皇
妣詔天下雲南花脚蠻為寇詔招諭之平江嘉定州
飢遼陽荅陽失蠻闊闊部風雹並賑之澧州歸州飢
賑糴米二萬石是歲夏諸衛屯田及大都河間保定
濟南濟寧五路屬縣霖雨傷稼秋忻州定襄縣及忠
翊侍衛屯田所營田象食屯田所墮霜殺禾土番岷
州春疫夏旱西番寇鞏昌府

泰定元年春正月乙未以乃馬台為平章政事善僧
為右丞敕諸王哈刺還本部召江西行省平章政事
也兒吉你赴闕己亥以誅逆臣也先鐵木兒等詔天

下辛丑諸王大臣請立皇太子賜諸王徹徹禿金一
錠銀六十錠幣帛各百匹塔思不花金一錠銀四十
錠幣帛二百匹阿忽鐵木兒等金銀各有差壬寅以
故丞相拜住子荅兒麻失里為宗仁衛親軍都指揮
使徹里哈為左右衛阿速親軍都指揮使命僧諷西
番經於光天殿甲辰敕譯列聖制詔及大元通制刊
本賜百官丁未以稱海屯田萬戶府達魯花赤帖陳
假嶺北行中書省參知政事近侍忽都帖木兒假禮
部尚書使西域諸王不賽因部戊申八番生蠻常光
正等及楊黃五種人以其戶二萬七千來附請歲輸

布二千五百疋置長官司以撫之巴西命諸王遠徙者悉還其部召親王圖帖睦爾于瓊州阿木哥于大同定怯薛台歲給鈔人八十錠甲寅賜諸王太平忽刺台別失帖木兒等金印敕高麗王還國仍歸其印糴米二十萬石賑京師貧民丙辰賜故監察御史觀音保鎖咬兒哈的迷失妻子鈔各千錠賜司徒道住印敕封解州鹽池神曰靈富公廣德信州岳州惠州南恩州民飢發粟賑之二月丁巳朔作顯宗影堂已未脩西番佛事於壽安山寺曰星吉思吃刺曰闊兒魯弗卜曰水朶兒麻曰颯間十里喃家經僧四十人

三年乃罷庚申監察御史傅巖起李嘉賓言遼王脫脫乘國有隙誅屠骨肉其惡已彰恐懷疑貳如今歸藩譬之縱虎出柙請廢之別立近族以襲其位不報甲子作佛事命僧百八人及倡優百戲導帝師游京城庚午選守令推官舊制臺憲歲舉守令推官二人有罪連坐至是言其不便復命中書於常選擇人用之壬申請上大行皇帝謚于南郊曰睿聖文孝皇帝廟號英宗甲戌江浙行省左丞趙簡請開經筵及擇師傅令太子及諸王大臣子孫受學遂命平章政事張珪翰林學士承旨忽都魯都兒迷失學士吳澄集

賢直學士鄧文原以帝範資治通鑑大學衍義貞觀政要等書進講復敕右丞相也先鐵木兒領之諸王怯別孛羅各遣使來貢高昌王亦都護帖木兒補化遣使進蒲萄酒丁丑監察御史宋本趙成慶李嘉賓言盜竊太廟神主由太常守衛不謹請罪之不報戊寅御史李嘉賓劾逆黨左阿速衛指揮使脫帖木兒罷之癸未宣諭也里可溫各如教具戒加封廣德路祠山神張真君曰普濟寧國路廣惠王曰福祐紹興慶元延安岳州潮州五路及鎮遠府河州集州旣發粟賑之三月丁亥朔罷徽政院立詹事院以太傅朶

台宣徽使禿滿迭兒桓國公拾得驢太尉丑驢峇刺罕並爲太子詹事中書參知政事王居仁爲太子副詹事以同知宣政院事楊廷玉爲中書參知政事罷大同路黃華嶺及崇慶屯田賜壽寧公主金十錠銀五十錠鈔二萬錠乙未以江西行省平章政事也兒吉你知樞密院事置定王薛徹干總管府給蒙古流民糧鈔遣還所部敕擅徙者斬歲匿者杖之賜諸王徹徹禿永福縣戶萬三千六百爲食邑仍置王傅戊戌廷試進士賜八刺張益等八十四人及第出身有差會試下第者亦賜教官有差中書省臣請禁橫奏

元史本紀卷三十九
賞賚及踰越奏事者從之庚子欽察罷爲陝西行臺御史大夫以四川行中書省平章政事囊加台兼宣政院使徃征西番寇叅卜郎癸卯命中書平章政事乃馬台攝祭南郊知樞密院事闊徹伯攝祭太廟以冊皇后皇太子告丙午御大明殿冊八八罕氏爲皇后皇子阿速吉八爲皇太子己酉以皇子八的麻亦兒間卜嗣封晉王泰寧王買奴卒以其子亦憐真朵兒赤嗣遣湘寧王八刺失里出鎮察罕腦兒罷宣慰司立王傳府以知樞密院事也先吉你爲雲南行省右丞相召流人還京師庚戌月直延民真只海阿荅罕來獻大珠監察御史宋本李嘉賓傅巖起言太尉司徒司空三公之職濫假僧人及會福殊祥二院並辱名爵請罷之不報癸丑諸王不賽因遣使朝貢臨洮狄道縣翼寧石州離石寧鄉縣旱飢賑米兩月廣西橫州徭寇永淳縣夏四月戊午廉恂罷爲集賢大學士食其祿終身賜乳母李氏鈔千錠賜征叅卜郎軍千人鈔四萬七千錠太尉不花平章政事即烈坐矯制以寡婦古哈強配撒梯被鞫詔以世祖舊臣原其罪己未以珠字詔賜帝師所居撒思加部庚申詔整飭御史臺作昭聖皇后御容殿於普慶寺辛酉命

昌王八刺失里往鎮阿難荅昔所居地親王圖帖睦爾至自潭州及王禪皆賜車帳馳馬癸亥以國言上英宗廟號曰格堅皇帝脩佛事於壽昌殿甲子車駕幸上都以諸王寬徹不花失刺平章政事兀伯都刺右丞善僧等居守以嶺北行中書省左丞潑皮爲中書左丞江南行臺中丞朶朶爲中書參知政事馬刺罷爲太史院使罷衛士四百人還宗仁衛賜北庭的撒光元魯軍羊馬諸王不賽因遣使來貢發兵民築渾河堤丙寅賜昌王八刺失里牛馬橐駝稅僧道邸舍積貨丁卯遣諸王捏古伯等還和林封八刺失里繼母買的爲皇妹昌國大長公主給銀印以忽咱某丁爲哈讚忽咱主西域戶籍辛未月食既癸酉以太子詹事禿滿迭兒爲中書平章政事甲戌命呪師作佛事厭雷庚辰以風烈月食地震手詔戒飭百官辛巳太廟新殿成木憐撒兒蠻部及北邊蒙古戶飢賑糧鈔有差江陵路屬縣飢雲南中慶昆明屯田水五月丁亥監察御史董鵬南劉潛邊苟慕完沙班以災異上言平章乃蠻台宣徽院使帖木兒不花詹事禿滿荅兒黨附逆徒身虧臣節太常守廟不謹遼王擅殺宗親不花即里矯制亂法皆蒙寬宥甚爲失刑乞

定其罪以銷天變不允已丑帝諭倒刺沙曰朕即位以來無一人能執成法爲朕言者知而不言則不忠且陷人於罪繼自今凡有所知宜悉以聞使朕明知法度斷不敢自縱非獨朕身天下一切政務能守法以行則衆皆乂安反是則天下罹於憂苦又曰凡事防之於小則易救之於大則難爾其以朕言明告于衆俾知所慎壬辰御史臺臣禿忽魯紐澤以御史言灾異屢見宰相宜避位以應天變可否仰自聖裁願惟臣等爲陛下耳目有徇私違法者不能糾察慢官失守宜先退避以授賢能帝曰御史所言其失在朕卿等何必遽爾禿忽魯又言臣已老病恐誤大事乞先退於是中書省臣兀伯都刺張珪楊廷玉皆抗疏乞罷丞相旭邁傑倒刺沙言比者灾異陛下以憂天下爲心反躬自責謹遵祖宗聖訓脩德慎行敕臣等各勤乃職手詔至大都居守省臣皆引罪自劾臣等爲左右相才下識昏當國大任無所襄贊以致灾祲罪在臣等所當退黜諸臣何罪帝曰卿若皆辭避而去國家大事朕孰與圖之宜各相諭以勉乃職戊戌遷列聖神主于太廟新殿辛丑循州徭寇長樂縣甲辰赦上都囚答罪以下者丙午太白犯鬼侍御史高

奎上書請求直言辨邪正明賞罰帝善其言賜以銀幣丁未太白犯鬼積尸氣已酉賓州民方二等爲寇有司捕擒之癸丑命司天監崇星中書平章政事禿滿迭兒領宣徽使詹事丞回回請如裕宗故事擇名儒輔太子敕中書省臣訪求以聞袁州火龍慶延安吉安杭州大都諸路屬縣水民飢賑糧有差六月乙卯朔遣諸王闊闊出鎮畏兀賜金銀鈔千計戊午雲南蒙化州高蘭神塲寨主照明羅九等寇威楚庚申張珪自大都至以守臣集議事言逆黨未討奸惡未除忠憤未雪冤枉未理政令不信賞罰不公賦役不均財用不節請裁擇之不允諸王阿木哥薨賜鈔千錠諸王寬徹亦里吉赤來朝賜駙馬鐵木兒等部鈔一萬三千錠北邊戍兵鈔萬六千八十錠賑蒙古飢民遣還所部延安路飢禁酒癸亥作禮拜寺於上都及大同路給鈔四萬錠丙寅遣使招諭叅卜郎遣闊闊出等詣高麗取女子三十人廣西左右兩江黃勝許岑世興乞遣其子弟朝貢許之丁卯大幄殿成作鎮雷坐靜佛寺庚午置海刺禿屯田總管府辛未脩黑牙蠻荅哥佛事於水晶殿癸酉帝受佛戒於帝師已卯諸王怯別等遣其宗親鐵木兒不花等奉馴豹

西馬來朝貢詔䟽決繫囚存恤軍士免天下和買雜
役三年蠶戶差稅一年百官四品以下普覃散官一
等三品遞進一階遠仕瘴地身故不得歸葬妻子流
落者有司資給遣還仍著爲令雲南大理路你囊爲
寇大都真定晉州深州奉元諸路及甘肅河渠營田
等處雨傷稼賑糧二月大司農屯田諸衛屯田彰德
汴梁等路雨傷稼順德大名河間東平等二十一郡
蝗晉寧鞏昌常德龍興等處飢皆發粟賑之大同渾
源河真定濬沱河陝西渭水黑水渠州江水皆溢並
漂民廬舍宣德府鞏昌路及八番金石番等處雨雪
河間晉寧涇州揚州壽春等路湖廣河南諸屯田皆
旱秋七月丙戌思州平茶楊大車酉陽州冉世昌寇
小石耶凱江等寨調兵捕之諸王阿馬薨賻鈔五千
錠賜雲南王王禪鈔二千錠諸王阿都赤鈔三千錠作
楠木殿招諭船領義寧靈川等處徃庚寅遣使代祀
岳瀆丙申以諸王薛徹禿襲統其父完者所部仍給
故印己亥賑蒙古流民給鈔二十九萬錠遣還仍禁
毋擅離所部遠者斬庚子諸王伯顏帖木兒出鎮闊
連東部阿刺忒納失里出鎮沙州各賜鈔三千錠撒
忒迷失率衛士佐太師按塔出行邊賜鈔千錠癸卯

罷廣州福建等處採珠蠶戶爲民仍免差稅一年丙午以畏兀字譯西番經丁未崇星于上都司天監以山東鹽運司判官馬合謨爲吏部尚書佩虎符翰林脩撰楊宗瑞爲禮部郎中佩金符奉即位詔往諭安南置長慶寺以宦者阿亦伯爲寺卿罷中瑞司中書省臣言東宮衛士先朝止三千人今增至萬七千請命詹事院汰去仍依舊制從之戊申以籍入鐵木迭兒及子班丹觀音奴貳產給還其家奉元路朝邑縣曹州楚丘縣大名路開州濮陽縣河溢大都路固安州清河溢順德路任縣沙澧洺水溢真定廣平廬州等十一郡雨傷稼龍慶州雨雹大如雞子平地深三尺定州屯河溢山崩免河渠營田租大都鞏昌延安冀寧龍興等處飢賑糶有差廣西慶遠徭酋潘父綸等率衆來降署爲簿尉等官有差加封温州故平陽侯曰英烈侯八月甲寅徹兒火兒火思之地五千貧乏賑糧二月乙卯敕以刑獄復隸宗正府依世祖舊制刑部勿與丙辰享太廟丁巳賜諸王八里台黃頭鈔各千五百錠禁言赦前事庚申市牝馬萬匹取湏酒賑帖列干木倫等驛戶糧鈔有差辛亥遣翰林學士承旨斡赤祀太祖太宗睿宗御容于普慶寺賜

親王圖帖睦爾鈔三千錠庚午作中宮金脊殿辛未
繪帝師八思巴像十一頒各行省俾塑祀之敕武官
坐罪制授者以聞勅授者從行省處決以金泉館酒
課賜公主壽寧丁丑罷浚玉泉山河役車駕至大都
癸未敕樞密役軍凡三百人以上奏聞詔諭雲南太
車里小車里秦州成紀縣大雨山崩水溢壅土至來
谷河成丘阜汴梁濟南屬縣雨水傷稼賑之延安冀
寧杭州潭州等十二郡及諸王哈伯等部飢賑糧有
差九月乙酉封也速不堅爲荆王賜金印以宣德府
復隸上都留守司辛卯罷哈思的結魯思伴卜總統
所更置臨洮總管府賜潛邸衛士鈔萬錠丙申葺太
祖神御殿乙巳昭獻元聖皇后忌日修佛事飯僧萬
萬人敕存恤武衛軍一年癸丑以籍入阿散家貲給
其子脫列改邕州爲南寧路岑世興遣其弟興元來
朝貢奉元路長安縣大雨澧水溢延安路洛水溢濮
州館陶縣及諸衛屯田水建昌紹興二路飢賑糧有
差冬十月乙卯秦州成紀縣趙氏婦一產三男成都
嘉穀生一莖九穗丁巳監察御史王士元請早諭教
太子帝嘉納之戊午享太廟立壽福總管府秩正三
品典累朝神御殿祭祀及錢穀事降大天源延聖寺

總管府爲提點所以隸之庚申命左右相日直禁中
有事則赴中書丙寅太白犯斗己巳太白入斗太陰
犯填星雲南車里蠻爲寇遣韓耳朶奉詔招諭之其
酋塞賽子尼面雁搆木子刁零出降庚午太白犯斗
壬申安南國世子陳日曠遣其臣莫節夫等來朝貢
真州珠金沙河松江府吳江州諸河淤塞詔所在有
司傭民丁浚之丙子命帝師作佛事於延春閣丁丑
緬國王子吾者那等爭立歲貢不入命雲南行省諭
之徙封雲南王王禪爲梁王食邑益陽州六萬五千
戶仍以其子帖木兒襲封雲南王封親王圖帖睦爾
爲懷王食邑端州六萬五千戶增歲賜幣帛千匹並
賜金印壬午熒惑犯壘壁陣肇慶徃黃寶才等降延
安路飢發義倉粟賑之仍給鈔四千錠廣東道及武
昌路江夏縣飢賑糶有差河南廉訪使買奴坐多徵
公田租免官以魯國大長公主女適懷王己丑命道
士修醮事癸巳遣兵部員外郎宋本吏部員外郎鄭
立阿魯灰工部主事張成太史院都事費著分調閩
海兩廣四川雲南選諸王不賽因言其臣出班有功
請官之以出班爲開府儀同三司靖國公給銀印金
符賜諸王散木台也速速兒鈔各千五百錠韓耳朶

平鈔千二百錠魯賓鈔千五百錠甲午崇星于回回
司天監己亥以术温台知樞密院事辛丑造金寶蓋
飾以七寶貯佛舍利甲辰作歌山鹿頂樓于上都丁
未釋笞四十七以下囚及輕罪流人給鈔二千錠散
與貧者印明年鈔本至元鈔四十萬錠中統十萬錠
己酉詔免也里可温答失蠻差役庚戌招諭融州徭
般領大小木龍等百七十五團河間路飢賑糧二月
汴梁信州泉州南安贛州等路飢賑糶有差嘉定路
龍興縣飢賑糧一月大都上都興和等路十三驛飢
賑鈔八千五百錠十二月癸丑朔以岑世興爲懷遠

大將軍遙授沿邊溪洞軍民安撫使佩虎符仍來安
路總管黃勝許爲懷遠大將軍遙授沿邊溪洞軍民
安撫使佩虎符致仕其子志熟襲爲上思州知州降
詔宣諭仍各賜幣帛二乙卯雲南徭阿吾及歪鬧爲
寇行省督兵捕之庚申同州地震有聲如雷癸亥鹽
官州海水溢屢壞隄障侵城郭遣使祀海神仍與有
司視形勢所便還請壘石爲塘詔曰築塘是重勞吾
民也其增石固扞禦庶天其相之乙丑給蒙古子女
孳畜丙寅命翰林國史院修纂英宗顯宗實錄敕內
外百官凡行朝賀等禮雨雪免朝服庚午熒惑犯外

屏辛未新作棕殿成諸王鎖思的薨賻鈔五百錠乙亥太白經天曲赦重囚三十八人以為三宮祈福夔路容米洞蠻田先什用等九洞為寇四川行省遣使諭降五洞餘發兵捕之陝西行省以兵討階州土蕃察罕腦兒千戶部飢賑糧一月延安路雹灾賑糧一月温州路樂清縣鹽場水民飢發義倉粟賑之兩浙及江東諸郡水旱壞田六萬四千三百餘頃

二年春正月丙戌辰星犯天雞乙未以畿甸不登罷春畋禁后妃諸王駙馬毋通星術之士非司天官不得妄言禍福敕御史臺選舉與中書合議以聞中書

省臣言江南民貧僧富諸寺觀田土非宋舊置并累朝所賜者請仍舊制與民均役從之以藉八思吉思地賜故監察御史觀音寶鎖咬兒哈的迷失妻子各十頃戊戌造象輦參卜郎來降賜其酋班木兒銀鈔幣帛辛丑懷王圖帖睦爾出居于建康壬寅太白犯建星甲辰奉安顯宗像于永福寺給祭田百頃廣西山獠為寇命所在有司捕之江浙行省平章政事脫歡荅刺罕陞為左丞相諸王怯別遣使貢方物賜鈔四萬錠戊申以乞刺失思八班歲卜為土蕃等路宣慰使都元帥兼管長河西奔不見亦思剛察沙加兒

朵甘思朶思麻等管軍達魯花赤與其屬往鎮撫參
卜郎庚戌詔諭宰臣曰向者卓兒罕察苦魯及山後
皆地震內郡大小民飢朕自即位以來惟太祖開創
之艱世祖混一之盛期與人民共享安樂常懷祗懼
災沴之至莫測其由豈朕思慮有所不及而事或僭
差天故以此示儆卿等其與諸司集議便民之事其
思自死罪始議定以聞朕將肆赦以詔天下肇慶肇
昌延安贛州南安英德新州梅州等處飢賑糶有差
閏月壬子朔詔赦天下除江淮勑科包銀免被災地
差稅一年庚申修野狐嶺色澤桑乾嶺道乙丑命整

治屯田河南行省左丞姚煒請禁屯田吏蠶食屯戶
及勿務羨增以廢裕民之意不報丁卯中書省臣言
國用不足請罷不急之費從之置惠遠倉永需庫於
海刺禿總管府己巳修潭沱河堰壬申罷永興銀場
聽民採鍊以十分之二輸官罷松江都水庸田使司
命州縣正官頒之仍加兼知渠堰事癸酉作棕毛殿
丙子浙西道廉訪司言四方代祀之使弃公營私多
不誠潔以是神不歆格請慎擇之山南廉訪使帖木
哥請削降鐵失所用驟陞官戊寅諸王忽塔梯迷失
等來朝賜金銀鈔幣有差己卯河間真定保定瑞州

四路飢禁釀酒階州土蕃爲寇鞏昌總帥府調兵禦
之站八兒監藏叛於兀敦保定路飢賑鈔四萬錠糧
萬五千石雄州歸信諸縣大雨河溢被災者萬一千
六百五十戶賑鈔三萬錠南賓州棣州等處水民飢
賑糧二萬石死者給鈔以葬五花城宿城秃拙只干
麻兀三驛飢賑糧二千石衡州衡陽縣民飢瑞州蒙
山銀場丁飢賑粟有差山東廉訪使許師敬請頒族
葬制禁用陰陽相地邪說二月甲申祭先農丙戌頒
道經于天下名山宮觀丁亥平伐苗酋的娘率其戶
十萬來降土官二百六十人請朝湖廣行省請汰其

衆還部令的娘等四十六人入覲從之己丑加嗣漢
三十九代天師張嗣成太玄輔化體仁應道大真人
庚寅熒惑辰星填星聚于畢辛卯賑安定王朶兒只
班部軍糧三月爪哇國遣其臣昔刺僧迦里也奉表
及方物來朝貢廣西徭潘寶陷柳城縣丁酉祭星于
回回司天監己亥命西僧作燒壇佛事於延華閣封
阿里迷失爲和國公張珪爲蔡國公仍知經筵事以
中書右丞善僧爲平章政事參知政事潑皮爲右丞
御史大夫秃忽魯加太保仍御史大夫庚子姚煒以
河水屢決請立行都水監於汴梁倣古法備捍仍命

瀕河州縣正官皆兼知河防事從之丙午造玉御床
戊申命道士祭五福太一神庚戌通遼二州飢發粟
賑糶薊州寶坻縣慶元路象山諸縣飢賑糧二月廿
州蒙古驛戶飢賑糧三月大都鳳翔寶慶衡州潭州
全州諸路飢賑糶有差三月癸丑脩曹州濟陰縣河
隄役民丁一萬八千五百人甲寅禁捕天鵝丁巳賜
諸王帖木兒不花等鈔有差辛酉咸平府清河寇河
合流失故道壞堤堰救蒙古軍千人及民丁修之乙
丑車駕幸上都諸王搠思班部戰士四百人征參卜
郎有功人賞鈔四千錠乙亥安南國世子陳日煬遣
使貢方物荆門州旱澇州薊州鳳州延安歸德等處
民及山東蒙古軍飢賑糧鈔有差肇慶富州惠州袁
州江州諸路及南恩州梅州飢賑糶有差夏四月丁
亥作吾殿癸巳和市牝馬有駒者萬匹敕宿衛馳馬
散牧民間者歸官廐飼之丁酉濮州鄆城縣言城西
堯塚上有佛寺請徙之不報辛丑加公主壽寧爲皇
姊大長公主禁山東諸路酒丙午棘夷及菟雁遮殺
雲南行省所遣諭蠻使者敕追捕之丁未封后父火
里兀察兒爲威靖王戊申以許師敬爲中書左丞中
政使馮亨爲中書參知政事仍中政使奉元路白水

縣電鞏昌路伏羌縣大雨山崩鎮江寧國瑞州桂州
南安寧海南豐潭州涿州等處飢賑糧五萬餘石隴
西漢中秦州飢賑鈔三萬錠五月壬子車里陶刺孟
及大阿哀蠻兵萬人乘象寇陷朶刺等十四寨木邦
路蠻八廟率焚夷萬人寇陷倒八漢寨督邊將嚴備
之癸丑龍牙門蠻遣使奉表貢方物辛未罷京師官
鬻鹽肆十五改河間鹽運司爲大都河間等路都轉
運鹽使司遣察乃使于周王和世琜癸酉融州否泉
洞吉龍洞洞村山黑江諸徃爲寇廣西元帥府發兵
討之丙子旭邁傑等以國用不足請減廐馬汰衛士

及節諸王濫賜從之賜潛邸怯憐口千人鈔三萬錠
浙西諸郡霖雨江湖水溢命江浙行省及都水庸田
司興役疏洩之置諫議書院於昌平縣祀唐劉蕡大
都路檀州大水平地深丈有五尺汴梁路十五縣河
溢江陵路江溢洮州臨洮府雨雹潭州興國屬縣旱
彰德路蝗龍興平江等十二郡飢賑糶米三十二萬
五千餘石鞏昌路臨洮府飢賑鈔五萬五千錠六月
己卯朔皇子生命巫祓除于宮葺萬歲山殿靜江徃
爲寇遣廣西宣慰司發兵捕之辛巳柳州徃爲寇戊
兵討斬之癸未潯州平南縣徃爲寇達魯花赤都堅

都監姚泰亨死之甲申改封嘉王晃火帖木兒爲并
王丙戌填星犯井鉞星丙申中書參知政事左塔不
台言大臣兼領軍務前古所無鐵失以御史大夫也
先帖木兒以知樞密院事皆領衛兵如虎而翼故成
逆謀今軍衛之職乞勿以大臣領之庶勲舊之家得
以保全從之仍賜幣帛以旌其直丁酉靜江義寧縣
及慶遠安撫司蠻徭爲寇敕守將捕之息州民趙丑
厮郭菩薩妖言彌勒佛當有天下有司以聞命宗正
府刑部樞密院御史臺及河南行省官雜鞠之辛丑
柳州馬平縣徭爲寇湖廣行省督所屬追捕之丙午
填星犯井丁未立都水庸田使司浚吳松二江勅營
造毋役五衛軍士止以武衛虎賁二衛給之開南府
阿只弄哀培蠻兵爲寇命雲南行省督所屬兵捕之
通州三河縣大雨水丈餘潼川府綿江中江水溢入
城郭吳寧路汾河溢秦州秦安山移新州路旱濟南
河間東昌等九郡蝗奉元衛輝路及永平屯田豐贍
昌國濟民等署雨傷稼蠲其租濟寧興元寧夏南康
歸州等十二郡饑賑糶米七萬餘石鎮西武靖王部
及遼陽水達達路饑賑糧一月秋七月戊申朔大小
車里蠻來獻馴象乙酉賜諸王燕大等金鈔有差庚

成遣阿失伯祀宅神于北部行幄甲寅遣使奉詔分諭徭蠻鎮康路土官你囊謀粘路土官賽丘羅出降木邦路土官八廟既降復叛崇星于上都司天監紐澤許師敬編類帝訓成請於經筵進講仍俾皇太子觀覽有旨譯其書以進丙辰享太廟播州蠻黎平愛等集群夷爲寇湖廣行省請兵討之不許詔播州宣撫使楊也里不花招諭之戊午遣使代祀龍虎武當二山己未置車里軍民總管府以土人寒賽爲總管佩金虎符中書省臣言徃歲征徭蕪訪司劾其濫殺今凡出師請廉訪司官一員蒞軍糾正從之庚申以

宮人二賜藩王怯別癸亥脩大乾元寺以許師敬及郎中買驢兼經筵官廣西諸徭寇城邑遣湖廣行省左丞乞住兵部尚書李大成中書舍人買驢將兵二萬二千人討之仍以諸王幹耳朵罕監其軍海北徭酋盤吉祥寇陽春縣命江西行省督兵捕之庚午以國用不足罷書金字歲經威楚大理諸蠻爲寇雲南行省請出師不允遣亦刺馬丹等使大理普顏實立等使威楚招諭之思州洞蠻揚銀千等來獻方物封駙馬孛羅帖木兒知樞密院事火沙並爲郡王辛未立河南行都水監申禁漢人歲執兵仗有軍籍者出

征則給之還復歸于官壬申御史臺臣言廉訪司蒞
軍非世祖舊制賈胡鬻寶西僧修佛事所費不貲於
國無益並宜除罷從之敕太傅及太保禿忽魯日
至禁中集議國事猛蠻番寶寇鐔津義寧來宿諸縣
命廣西守將捕之慶遠溪洞民饑發米二萬五百石
平價糶之敕山東州縣收養流民遺棄子女延安廊
州綏德鞏昌等處雨雹般陽新城縣蝗宗仁衛屯田
隕霜殺禾睢州河決順德汴梁德安汝寧諸路旱免
其租梅州饒州鎮江邠州諸路飢賑糶米三萬餘石
八月戊子修上都香殿辛卯雲南白夷寇雲龍州癸

巳歲星犯大罇辛丑遣使代祀岳瀆名山大川敕諸
王私入京者勿供其所用諸部曲宿衛私入京者罪
之命度支監汰阿塔赤所掌駝馬於外郡飼之大都
路檀州鞏昌府靜寧縣延安路安塞縣雨雹衛輝路
汲縣河溢南恩州瓊州飢賑糧一月臨江路歸德府
飢賑糧二月衡州建昌岳州飢賑糶米一萬三千石
九月戊申朔分天下爲十八道遣使宣撫詔曰朕祇
承洪業夙夜惟寅凡所以圖治者悉遵祖宗成憲曩
屢詔中外百司宣布德澤蠲賦詳刑賑恤貧民思與
黎元共享有生之樂尚慮有司未體朕意庶政或闕

惠澤未洽承宣者失於撫綏司憲者怠於糾察俾吾
民重困朕甚憫焉今遣奉使宣撫分行諸道按問官
吏不法詢民疾苦審理寃滯凡可以興利除害從宜
舉行有罪者四品以上停職申請五品以下就便處
決其有政績尤異暨晦跡丘園才堪輔治者具以名
聞以湖廣行省叅知政事馬合某河東宣慰使李慶
恭之兩浙江東道江東道廉訪使朶列禿太史院使
齊履謙之江西福建道都功德使舉赫伯荆湖宣慰
使蒙弼之江南湖廣道禮部尚書李家奴工部尚書
朱贊之河南江北道同知樞密院事阿吉刺御史中
丞曹立之燕南山東道太子詹事別帖木兒宣徽院
判韓讓之河東陝西道吏部尚書納哈出董訥之山
北遼東道陝西鹽運使衆家奴中書斷事官韓庭茂
之雲南省湖南宣慰使寒食冀寧路總管劉文之甘
肅省山東宣慰使禿思帖木兒陝西行省左丞廉惇
之四川省翰林侍講學士帖木兒不花秘書卿吳秉
道之京畿道以郡縣飢詔運粟十五萬石貯瀕河諸
倉以備賑救仍敕有司治義倉禁大都順德衛輝等
十郡釀酒募富民入粟拜官二千石從七品千石正
八品五百石從八品三百石正九品不願仕者旌其

門諸王幹，即遣使貢金浮圖已酉海運江南糧百七十萬石至京師庚戌復尚乘寺光祿寺爲正三品給銀印癸丑車駕至大都遣使祀海神天妃甲寅禁飢民結扁擔社傷人者杖一百著爲令乙卯享太廟已未岑世興上言自明不反請置蒙古漢人監貳官詔優從之壬戌諸王牙即貢馬丁丑浚河間陳王帶河廣西徃寇賓州禮部員外郎元永貞言鐵失弒逆皆由鐵木迭兒始禍請明其罪仍錄付史館以爲人臣之戒漢中道文州霖雨山崩檀州雨雹開元路三河溢瓊州南安德慶諸路飢賑糧鈔有差冬十月戊寅

朔張珪歸保定上冢以病辭祿不允岑世興及子鐵木兒率衆寇上林等州命撫諭之壬午禁成都路釀酒癸未以倒刺沙爲御史大夫丁亥享太廟已丑賜恩平王塔思不花部鈔五千錠壬辰熒惑犯氐癸巳填星退犯井播州凱黎苗率諸寨苗獠爲寇乙未皇后亦憐真八剌受佛戒於帝師丁酉廣西徃酋何童降請防邊自効從之乙巳寧遠知州添插言安南國土官押那攻掠其木末諸寨請治之敕安南世子諭押那歸其俘丙辰寧夏路曹州屬縣水霸州衢州路饑賑糧二月戊申周王和世琜遣使以豹來獻改長

寧軍爲州庚戌旭邁傑以歲饑請罷皇后上都營繕
從之紐澤以病乞罷不允丙辰郭善蔭等伏誅杖流
其黨丁巳幸大承華普慶寺祀昭獻元聖皇后于影
堂賜僧鈔千錠岑世興結八番蠻班光金等合兵攻
石頭等寨敕調兵禦之八番宣慰司官失備坐罪戊
午填星退犯井宿鉞星己未詔整飭臺綱庚申倭舶
來互市廣西道宣慰使獲徭酋潘寶下獄其弟潘見
遂寇柳州命湖廣行省左丞乞住捕之壬戌敕軍民
官陰襲者由本貫圖宗支申請銓授丙寅倒刺沙復
爲中書左丞相加開府儀同三司錄軍國重事丁卯

罷蒙山銀冶提舉司命瑞州路領之壬申賜諸王不
賽因鈔二萬錠帛百匹諸王幹耳朶罕遣使以追捕
廣西徭寇上聞帝曰朕自即位累詔天下憫恤黎元
惟廣徭屢叛殺掠良民故命幹耳朶罕等討之今聞
迎降者甚衆宜更以恩撫之若果不悛嚴兵追捕京
師飢賑糶米四十萬石內郡飢賑鈔十萬錠米五萬
石河間諸郡流民就食通遼二州命有司存恤之杭
州路火賑貧民糧一月常德路水民飢賑糧萬一千
六百石十二月戊寅以塔失帖木兒爲中書右丞相
癸未加塔失帖木兒開府儀同三司上柱國錄軍國

重事監修國史封薊國公諸王不賽因遣使貢珠賜
鈔二萬錠乙酉帝復受佛戒於帝師熒惑犯天江辰
星犯建星丁亥修鹿頂殿鎮南王脫不花薨遣中書
平章政事乃馬牙攝鎮其地中書省臣言山東陝西
湖廣地接戎夷請議選宗室往鎮從之申禁圖讖私
藏不獻者罪之癸巳京師多盜塔失帖木兒請處決
重囚增調邏卒仍立捕盜賞格從之甲午太白犯壘
壁陣召張珪於保定丁酉加紐澤知樞密院事與馬
某沙並開府儀同三司苑瑞州路酒禁左丞乞任諸
王幹耳朵罕征徭賊敗之元江路土官普山爲寇命
戍兵捕之壬寅大寧路鳳翔府飢禁釀酒右丞趙簡
請行區田法於內地以宋董煟所編救荒活民書頒
州縣濟南延川二路飢賑鈔三千五百錠惠州杭州
等處飢賑糴有差是歲陝西府雨雪御河水溢以故
翰林學士不花中政使普顏篤指揮使卜顏忽里爲
鐵失等所繫死贈功臣號及階勳爵謚

本紀卷第二十九



#9562
3030

三ノ
三ノ
三ノ

29440

甲

